





鮎埼亭詩集卷第六

甬上全祖望紹衣著

谿上後學鄭爾齡校刊

萊陽姜忠肅公祠神絃曲

有序。以下偷兒棄餘集

祠在象山初忠肅死節其次公貞毅先生以建言櫻

烈帝怒不予卹南渡始有贈諡祠祭而山左道梗赧

王亦遽亡東江之役長公如圃先生方知象山於是

監國遣大理評事王公石雁卽縣建祠致祭并祔其

一子三婦一女之同死者貞毅貞文之至吾鄉蓋以

此也不旋踵而甬勾又內附葺宏之血未消尹鐸之

城已隳百年以來祠爲廣文博士寓舍海隅僻陋幾



莫知忠肅爲誰何人也近有姜生炳璋者象山後起之秀來問余曰忠肅何以得祠象山予以顛末告之生乃拂拭其栗主且言於廣文分學田以修祀事并將新其祠宇可謂匡扶世教者也予旣銘其麗牲之石復譜神絃以貽之

神之降兮海東羽旗飄颻兮光曈曈誰使神無家兮良可恫白版帝子兮憐孤忠招遊魂兮爲寄公有兒墨衰兮正從戎保茲香火兮賴茲提封神其來兮駐我蒼宮神之來兮海右謝嘉命兮稽首天使拜前兮賓僚拜後可憐薄命兮殊恩難久五日京兆兮西陵失守六宮

野哭兮孤臣何有嗟甲乙之客兮誰某蒿萊長兮狐兔走神之來兮不歸謂是吾王之賜兮百世其依典禮皇皇兮詎賦式微朝遊石浦兮暮宿天門之陞佳兒佳婦兮追隨時有發鳩兮薦以蕨薇吳門雖廟祀兮非神所棲神之居兮寂寞乃有好事兮出空谷訪舊聞兮補殘錄謂國雖亡兮禮可續明祀淪胥兮斯文之辱上下旁皇兮遇之冥漠野田雖瘠兮意不薄春有蘭兮秋有鞠選明粢兮釀新醪甘棠已枯兮重濯濯以教忠兮礪俗神其歆之兮不須巫祝

故光祿陳公士京遺集予求之二十年矣今春人



日忽得其手稿喜而有作

逋叟風高漢管寧半生心跡付滄溟海年竟向鮫宮盡

喟寓時呼蛋戶聽海年喟寓即公集名故國到今傳義士遺文不

沒有神靈昨挑七種新芽菜把酒長吟酌一瓶

樊榭以湖上春水船詩索和

消受春風何處佳澄湖一葉足浮家薄寒因為添微雨

新漲多緣瀦落花遊女愛歌將進酒詞人遍唱浪淘沙

嘉名肇錫從詩老不繫園吟好共夸

小寒食日仝人泛舟湖上和楊東維花遊曲

新綠穆穆陰濛濛明朝知有清明風扁舟逕到重湖裏

南屏山色碧於水當壚少婦笑倚門春愁飛上蛺蝶裙

顧謂遊人試緩步前頭便是蒼公墓冬青花信杳不來

願君酬之酒一杯酒酣長嘯傾墨椀詩成低唱叶檀板

東臺之東西臺西聊借花遊漫興題春光合為詞人使

轉眼花期過廿四多情少婦乞短箋借問即席成幾篇

和樊榭城北菜花詩

城北來看宿雨痕野蔬香氣正氤氳幾番花信寧遺汝

一片春心別有羣誰為點酥和碧水遙疑捧日湧祥雲

退紅沉紫都零落輸與園官擅至文

繡谷山房藤花下小集分韻



東風吹遍扶留枝詩人豫擬餞春詞玲瓏簾下思手澤  
 角弓封殖何繁滋渾訝軒后蒼龍蜿蜒去胡髯忽自空  
 中垂斜穿倒掛不可數化作餘霞千仞輝一庭新綠萬  
 纓絡雄虹雌蜺交蔽虧上有遊蜂浪蝶探香窟下有落  
 英片片投酒卮主人笑斟琥珀髓謂詩不成客無歸我  
 詩草草多率筆安得橫空硬盤與花爭崛竒

鈍夫觀察巡視浙東海隄次日爲元已屏去車從

修稷蘭亭真韻事也寄以二律

雙旌瀟灑度東州令節閒爲蘭上遊勾踐社荒小草在  
 永和春老羽觴留山僧能指冬青穴河女猶傳夏統舟

記得明湖修閨事會陪高座比羊劉

謂去年南屏之集

萬壑春流迤使君湘湖蓴菜碧於雲一帆已盡濤江勝

十集還摹稷帖文高致詎慚王內史同行惜少鮑參軍

時海防通守鮑辛浦以目眚不豫

此遊定有詩成錄越絕新編續舊聞

題蘄齋遊金鵝山看桃花遇雪圖時有遷牧禹州

之命

金鵝山裏如天台紅雨夾岫連巖開令君援琴奏白雪  
 一霎中天應召來波下花光爭灑灑樹頭絲髻翻濯濯  
 焉支縞素互生動春姿巧借冬心培令君含笑呼新醅  
 山靈爲我潤芒鞋河陽正惜潘郎去元都尙盼劉郎回



我亦披圖長戀戀身未入山神與偕

。夜讀漢書

英英漢武皇強仁更慕義六經置學宮公車招俊乂其  
如內多欲色取少真意天門高岌巖浮雲更迭蔽將謂  
下界臣窺伺良不易誰知汲內史一言洞肝肺

於赫田武安淫威亦以汰魏其且蔑如寧復有倫輩靡  
然爭膝席將以邀盼睐盼睐亦難邀聊以免罪戾吁嗟  
羞惡心於人豈不大所以灌仲孺裂脰更不悔

嫉媚公孫子曲學善阿世及其誅郭解居然持斷制直  
教大將軍俛首屈正議同時奸宄徒聞聲羣喪氣一事

足表章未可言尸位茫茫論世餘公孫尙難跂

粵若建武初生材亦已多乾綱正獨運十九遭坎軻忽  
焉文武盡是誰潛折磨折磨固不恨其如國脈何愛老  
與愛少志士恥揣摩可惜馮郎中白首竟蹉跎

家訊至知昭兒已就塾

遙聞兒請業梨栗非所戀先人表治傳危繫斯一綫勿  
讀無益書貽笑賤儒賤

阿翁讀半世無救寒與饑里中新秦兒誹誚固其宜豈  
知君子節不以集枯移

平生所願學豈不在昌黎獨於訓子詩不爲兒誦之遐



哉善努力固窮以為期

從來名父子強半成碌碌汝父負虛聲撫躬慚涼薄幹  
蠱在兒郎類我則已辱

胥江夜泊有感淮張舊事

中山礮火下襄陽王蔡諸兒尙處堂一夜玉峯收霸氣  
隔江鹵海墮凶芒幅巾不為興朝屈銀椅終隨愛弟戕

始悔連鷄無遠畧上流失計聽陳亡

中山王以襄陽礮破吳軍

且莫論人成敗中鄭君終不負重瞳是誰浮海祈王帥

有客臨江弔楚公

謂九靈夷白也

應怪荒朝偏得士翻嫌新主

未憐忠更聞一掌柯陳地三百年來道未通

友諒之暴而有累世

効忠者異矣

君王百戰定姑蘇逆命原非黔首辜不為一方紆積困

更讐遺孽有加租序書何必煩多誥筮易先聞罪後夫

近日累傳寬大詔三吳始得免流逋

予嘗謂明祖之虐民於吳為最甚

以十洲春餽茶塢

酒名宋時甬上嘗以入貢今其法尙存於慈谿畧與潯酒伯仲

十洲春色好冲淡在神明坐笑濁醪濁來投清聖清翩

翩六從事遠到闔廬城風浴歸來後陶然移我情

信宿水木明瑟園東茶塢

湜湜上沙水靄靄靈巖雲雲從西山下水自東江分積  
翠望中落妙香空際聞以野乃更秀以淡乃更文嬋娟



遺世立脂粉不足羣賦才輸醜舫跋語推義門諸公不  
可作空餘醉墨痕而我但搓手蒼然對晚曛

介翁昔經始一榻來松陵太湖感落日是亦百六徵草

堂成汐社高節凜淵冰故園雖改姓空亭未易名主人

瀟灑姿足以嗣典型流泉不改碧喬木有餘清春來舊

燕子繞梁還屏營可憐澗上居彌望已蒿芳

吳江徐高士介白築

此園高士嘗賦太湖落日見賞于臥子先生今園中有  
介白亭不忘所自也隔岸為昭法澗上草堂僅餘數椽

矣

清才如吾子蕭散絕風塵生世偶不偶抱山作詩人聊  
復與我曹泥飲消昕昏泥飲亦自佳麴部無垢氛五湖

好池館足餉上皇民嗟我尙鹿鹿衣食困蹄輪何時得  
息機葆茲淡蕩魂願為君灌園研北老耕耘

水木明瑟園阻歸

昨困炎威甚鳴鳩喚奈何中宵喧旅夢驚浪出林阿乍  
息怵怵累如傳踏踏歌曉來看池水新漲半篙多

豈是山靈意勾留遊子鞮雨呼公莫渡風唱客無歸花  
信行將盡濤聲不可磯浮屠休見誚三宿戒多違

主人應念我帶水隔遙村不惜淹三逕其誰共一尊空  
庭聞鳥語清思落苔痕明日應相見新詩好共論

水木明瑟園古藤歌



昔我遊京華及見三古藤其一尚書省猶傳文定舊都  
 廳俄而吳回降諄諄出出寒灰零其一海波街尚署金  
 風老子名俄而富媪震橫裂活埋歸杳冥其一合肥郎  
 五傳槐棘相因仍臨川侍郎下我榻喁喁于于和詩百  
 輩羸湘北相公邸第以師生相授受長洲韓尚書嘉善  
 曹侍郎韓城張尚書以至臨川先生皆官至九列  
稱盛事甲寅乙卯間予假  
 館焉同人咏古藤幾百家十年落拓湖海上良朋存沒  
 百感增驚見天平谷口雙崢嶸古根詰屈穿山出醞釀  
 洞庭七十二峯之精靈踞地先成偃臥形老巖當道羣  
 貉屏欲上不上意磅礴忽然蹶起勢騫騰百轉千蟠故  
 作態低頭下瞰紛長纓其心時復吐雲氣其幹將無聞

銅腥其杪迎風舞拂拂大垂小垂都瓏玲就中倏生數  
 直幹岸然如絃復如繩空所依傍冉冉升此尤怪絕得  
 未曾浙中繡谷亭前一本差相亞細校猶疑殊尹邢主  
 人選佳木插架三十楹蜿蜒循蒿逕亦以曲折成入門  
 未窺諸塢綠蔽天已見十丈青頻年三過此所惜未與  
 花期丁是藤不花亦復佳磔砢高節誰抗衡老我感舊  
 空怔營

○法螺菴采蓴東茶塢

在昔黃夫子未嘗吳下蓴誰知千里種留得五湖春有  
 客來董國前身亦晉人偶過蘭若裏一笑擷芳津澤望  
 先生



嘗疑近日吳下尊菜無聞謂其種已絕不知尚有存者但校浙中稍晚出耳

果堂纂吳江縣志索予所作蘇寅侯傳因需其潤

筆以戲之

辛苦蘇儀部埋魂天盡頭雪交亭下淚長共怒濤浮吾友陽秋筆圖經仗闡幽講堂一束脯餉我亦風流

奴子胥篋而逋得三絕

餓狼鳴我前饑豹鳴我後果然楊叛兒一朝脫兕走初筮喪僮僕再筮喪資斧剩餘笥中作斯人弃如土遲我渡江返黃金或稍克癡奴如鷄鼠此去太匆匆

酒耘先生令譜元人竇革所作予從永樂大典抄

之所載唐人令今無能行之者

事始原觴政於今盡失傳如何宰天下強欲祖周官

。午日秦淮燈船

故國百年消燭火遊人連櫂賞清時曲廊高閣還無恙不見當年丁繼之

觀音門夜眺

覆洲喧鳥遍平沙尙有鱗魚上酒家畢竟江南風景好

渡淮無復此清嘉梅朗三日選詩喧鳥覆春洲吾于燕子磯晚泊見之烹魚一醉致足樂也

滑園謁方丈望谿

平原放生址禽鳥猶清遐小山生白雲寒泉流紫霞穆



參高柳蔭熠熠新葵花侍郎此著書門外絕軒車

荆公論中壘強聒良苦多杜門謝世事聊足養天和寂

寞茲一區遺經供研摩猶餘草孟夢定不召風波

叢殘古六藝千秋雲霧深束髮事討論篤老猶沈吟揖

讓昔人間曠然挾其心此外可弗問郢書任如林

廿年荷陶鑄十年惜別離六年遭荼苦餘生患阻饑以

此成慚負著書杳無期猶喜素絲在未為緇所移侍郎今年

八十方七治儀禮自言加我數年當更有進處且戒予不當為汗漫之遊坐消日力

湛園先生為睢州湯文正公發義憤事予已載於

其行狀中望谿侍郎偶及之子謂如彼人者猶

屬天良之不盡澌滅者也侍郎笑而然之

一言惱殺沈梔林尙見斯人未死心若使怡然甘笑罵

將無放膽混人禽梔林沈維祖字也

晤寶應王太守孟亭於白門因乞其購梁公狄先

生兄弟遺集

葭州有寄公鷓林好兄弟我求五噫文廿載縈夢寐莫

道羊叔子不如銅雀妓

。題明太祖紀後是日以阻風因遊孝陵歸而賦此

恩威轉盼太無常幸保功名僅六王朝土空曹登黨案

書生環袂殉文章薇垣殺氣連天動竺國慈雲掃地亡



開國規模寧有此。頰宮亞聖亦倉皇。

太祖刑慘之慘高洋不是過也繼以

成祖國脈耗甚矣而濟以仁宣之寬大故得永世耳乃知壽國之功在嗣王也

曲臺浪說重經師。手著宸奎錄孝慈。並后已先陵冢嫡。

奪宗何怪啟駢枝。前星頻震終淪落。巖塞輕封半險危。

始信睢麟精意失。不徒官禮致乖漓。此論為前人所未發然有至理存焉

漫傳誠意撒胡床。草昧君臣未可忘。此事終應輸漢祖。

濠梁何處弔韓王。太祖以事韓為諱見于劉辰國初事蹟後人謬言文成撒床皆不攷然殺

之無乃已甚其實留之亦不害也

誰是條侯可授遺。滿朝勲輔盡陵夷。天台學士真儒者。

不救皇孫一炬危。

江東祗合供偏安。河北綿延控阨難。聞遣車徒卜函谷。

悔教弓劍瘞長干。具官空擬神京舊。亡國重增青蓋歎。

盛世於今隆繼絕。肯容樵牧妄摧殘。

江聲觀察見過

羨爾清臞甚蕭然。似布衣偶然談世事。依舊掩柴扉。祗

愛微吟好深憂。進奉非家山新著錄。媿我見聞希。江聲方輯

鳳山小誌旁徵文獻甚博

。題唐山夫人房中樂後。元城劉忠定公極稱夫人樂章之工而惜后妃傳中

之見遺予謂夫人之詩足不朽矣亦何必廁之娥姁之末也

縣官粗解風雲曲。豈有嬋通羣雅才。一自朱絃三嘆後。



楚歌巴唱盡輿臺  
 當年隨陸皆文士握管曾無鼓吹音笑倒叔孫諸弟子  
 濫將綿蕪聽清吟  
 舊遊尙應酌王負神鑒還當貴許侯開國英奇歸士女  
 更添彤管擅風流  
 野鷄人彘正紛爭樂府誰傳淑媛名莫侍衣冠遊渭北  
 淒涼永巷和春聲

謁褚文忠公祠和葑林

以下吳山消夏集

故居尙表忠清里舊恨休歌娥媚娘天子一朝忘顧命  
 孤臣萬里殉炎荒浪聞節惠名曾易直到咸通葬可傷

唐會要載公賜諡而史失之其歸葬事亦僅見唐彥謙集

三復梁郎祠下句我來歛

葑林原唱有曰佳兒佳婦言猶在元舅元勳事總虛可謂絕對

得穆堂先生信

年來喜報沉疴減近履皆傳眠食安荆國文章猶有託  
 槐堂薪火未曾寒雅知自任非遺世誰道佯狂爲弃官  
 竊恐夢爭到王室依然倔强似神完  
望谿侍郎頗疑先生以乞休故託病不知先生用世之心尙惓惓也

泊花池上尋荷

故人道山去鷄犬都仙遊荷花亦蕭索但有青魚留  
 公長躑躅斜日落西州



題史閣部傳後

當時若聽諸生策又費天兵再下車社稷終輸民命重

江淮千里免為魚禮賢館徵士有獻策者欲決高沙湖水以當背城之借閣部不可真大有

功於江淮也而閣部傳中失之

聞道

聞道中書令親防瓠子河度支良不惜疏導竟如何濁

浪南來健危隄郭上過朝朝卜秋汛莫笑杞憂多

欲與水爭地由來亦大難移民無上策沸鼎有狂湍國

仗魚鹽重人愁井里殘誰其刑白馬拜表訴重壇

先漢王延世前明潘季馴廟廷方側席海宇豈無人四

瀆何當合長淮未可湮天心憐赤子早為降庚辰

篙師編修近忽佞佛至誠且篤貽六絕句以諧之

想發一軒渠也

又被旁門去一雄居然提唱振宗風直探秘密天花藏

不信溫公與蜀公

先生經術更無儕不是元城卽了齋莫似屏山鼓狂舌

生姜樹上妄安排屏山謂李純甫

打鐘掃地差堪信割水吹光恐未然我是鈍根無宿果

輸君獨上竺西天

隔鄰老卒詠諧惡一卷楞嚴拱讀勤試向鷄鳴參要義



東方晴色定氤氳

范東叔告葉正則語

勾甬禪枝遍四方密公香火尙堂堂明年可整東遊屐

牙笏宮袍拜育王

詩人學佛最相宜切玉刀成遊刃嬉從此相逢須退舍

速營藕孔去登陴

禪是詩人切玉刀遺山句也

聖因寺

在昔仁皇帝頻年幸聖湖山川荷明德花鳥獻靈符

黃屋神猶在蒼生望未孤白頭諸父老試習舊嵩呼

谷林爲梅里祁氏彌甥每見夷度先生諸藏書尤

寶愛不惜重價購之嘗索予所有范正獻公集

孫學士春秋解方淙山易至再四以其皆淡生

堂物也予靳之未致谷林下世予始悔之乃以

付東潛使供之殯前而告之

東白先生親迎時東書堂前賦結縉太君解頰青箱本

郎婿能歌黃絹辭爾時諸祁已衰落殘籤剩帙紛嗟咨

中丞止水血久化公子逐日魂無歸零落都緣佞佛叟

屏當猶飽估書兒

梨洲先生曰祁氏藏書自季超學佛一切視爲土苴多半爲雲門沙彌持

去賣轉盼曠園竟榛莽先生憑弔淚如絲風流宅相真

健者代興蔚爲諸侯師小山插架十萬卷以視外家猶

過之凱風寒泉孝子慕青氈故物先君思每逢淡生舊



手澤購之不翅珊瑚枝擬將一卷別著錄屬予為序陳  
慈幃白華之養在帶草一笑何必斑斕衣更有王郎劈

窠字東書堂前歷劫遺王百穀書曠亭二大字谷林以置園中旁搜未竟

騎鶴去令我愁過泊花池徐君所志在挂劍孺子不須

陳隻鷄郎君試置兩楹上定有中宵降植藜

東潛論水心先生多所不滿予謂是宋史之誤也

當以其開禧上殿劄子正之

水心大功在王室左右餘干成夾日同心但有一平陽

幸挽宗祊免瓦裂平陽謂徐忠文公子宣論賞超然謝殊遷被錮

怡然甘三黜斯人斯學真有用豈獨文章稱卓絕開禧

晚用詎苟同力陳疲兵莫輕率浪試曾聞笑魏公輕言

幾自憐龍窟且營堡塢壯金湯更緩征求到蚌鮎為不

可勝待可勝報仇有道戰有術固辭草詔感慨多乃有

痴人如易被水心辭草詔山齋勸之蓋俄而淮漢果土

崩救敗終須勞一出斫營小試在沿江竟退封狐得安

集朝局再更論再翻營營者流妄周內及之由竇幸逃

誅孝友摩碑偶見脫改頭換面紛重來拮擊正人咨唐

突許及之即由竇尚書也雷孝友立陳自強碑見其陋

哉宋史何其蒙緇素糊塗不可詰誰人權史洞觀火一

為前賢洗誣屈永嘉世嫡在君家南塘經術紫芝筆但



莫放言貶曾孟斯案還須重審覈水心說學多偉論但貶曾子孟子則真賢

夜坐

會有西風作行看萬籟清何須怨寒暑一笑任虛盈歲序白駒過道心孤月明高梧多夜色沈冥羨莊生

始寧陳憲使明時奉使交州攜其牡丹以歸至今猶盛甌亭為之索賦

海桑社柏幾推遷尙有名花域外傳萬里軺車思舊德暮春風信動南天居隣媯氏耕畚野事憶郈王剪伐年珍重故家光故國不隨姚靳委荒煙

讀史小詠

方寸匆匆亂歸曹自不禁晚為中執法無乃負初心右徐庶

禮稱三不弔畏最笑人庸周家賢宰相後死媿韓通右李穀

補史亭中客空山夜哭時如何撰碑事千古有微詞按裕之為崔立撰碑事本傳不載別見王滹南傳中予讀陵川郝氏集惜之右元好問

長白詩人馬大鉢有讀淵明集句曰義熙尙有關心事豈便羲皇以上人堇浦最喜誦之果嶺語也予為反其言以成其意



感時已嘆黃農沒遺世羞為漢魏音不是羲皇真種子  
義熙誰復更關心

寄懷茶塢

義公始終高弟穉季生死故人結客已嗟金盡含杯不

道家貧義公謂義門學士穉季謂穉中太常

剛腸大類中散綺語又肖西崑賢者固不可測悠悠此

意誰論

箕亭憲使海昌署齋池館雜咏

其北有濃陰其南有微吟主人無俗韻此君亦虛心右竹

南詩屋

海波喜寧靜使君合高閒時聞桃花氣生香硯席間右晏

閒亭

漫天下飛白落地都微茫三春午睡醒詩思同清揚右絮

影軒

東西更南北妙蓮葉茸茸遊魚樂莫樂濠上正空濛右魚

戲闌

吳淞若可招得半亦已饒所愁夜半去堤捷得無勞右剪

淞堰

題天池風雨歸莊圖

濃雲如墨暝歸途風雨漫天一老夫青藤居士正沉醉



秃筆與之俱模糊

花間偶成

每于極盛須防厄看到將殘倍有情  
慚媿斯人長寂寞不華不實度虛生

秋賦

新傳挾書律辱過溺巾時不道諸才彥終無蕭望之

夢中有客口占二句贈予醒而續之

四窗五奧諸仙宅雙韭三菁大藥材  
我是玉皇香案吏生天早已住蓬萊

中秋前一夕葭林招登吳山不果移尊篁菴

天氣頗未佳諸君將安之老夫蘭若好  
三逕待新詩

淮南叢桂下招隱是吾心有客咏遠志  
愁聞夜鶴吟謂樊

榭

明月微濛下清酌曷再陳匆匆歸棹急  
定為捧心人謂董

浦

王生遭虐謔下箸幾遲回虎旣帥以聽  
恣君一飽來謂茨

簷

同人登吳山延慶道院看月分韻得天字

日昨中秋月黯然新晴喜上吳山巔  
左江右湖新漲綠山色與之俱洄沿  
傑閣凌虛挹西爽候蟲草際鳴萋萋



斜陽欲落未肯落一角猶挂前檐前忽然飛去不知處  
 清輝續照生寒烟寒烟和月墮入水精廬倒影迷地天  
 此時老子興不淺直欲凌風恣孤騫劃然長嘯聲所到  
 留遺猶堪五百年人生陸陸塵霧裏安得歡會永蟬連  
 良朋夜夜共樽酒月亦無復闕與圓

設林勸予移居于杭雪舫葉齋二使君亦云然而

甌亭和之獨堇浦有以知予之難於遷也

此間良足樂思蜀還瞿然既戀善和書亦念原氏阡以  
 茲幾躊躇孤負卜居篇我家舊吟社近在孤山前連劉  
 諸高士清風定有傳重荷諸君意為續城東緣

先泉翁結孤山

社寓居城東

他時倘幾幸得買陽羨田不妨一歲中來往三

江間所憂二使君速飛不我延

秋晴集聖因寺分韻

秋老湖光好細參過時衰柳尙穆穆晴雲與日爭高潔  
 新水連天共蔚藍遶寺遊船逐歸鳥一林涼氣下空潭  
 祇愁饒口哆張甚蔬笋雖精未飽酣

謂王瞿

設林柳漁甌亭竹田小集篁菴分韻

客與秋俱老花偏晚放春涼風排旅闥爽氣集詩人何  
 處聞長笛齊來墊角巾嘉名重九近白社有閒民

白海棠



媽紅尙愁人何堪更縞素日暮嘿垂頭貞心畏行露

重九雨止然晴色未老不敢入山因共同人閒遊

城東諸蘭若用米元章九日韻

疑雨疑晴未定天幾人吟眺罷觥船偶尋綠水來城角  
但見蒼苔繞佛前此日清遊真寂寞他年詩句定流傳  
木樨花落黃花早幽興翻緣得地偏

咏秋芍藥同葑林

花譜以秋牡丹目之洞庭山中  
花工爲之改名以其爲草本故

也

小草休夸帶與鞞秋花尙冒殿春名輕盈定入揚州夢  
蕭瑟終含楚客情暮靄凝時山共翠濁醪香處客同赧

老夫正有將離賦對爾能無百感生

莓厓周都御史先司空公石友也其從孫副使汝

觀先宗伯公媼家也今其後人已盡偶與穆門

徵君詢其世次則莓厓之裔遷杭四世矣爲之

驚喜因勸其東歸展墓以存故鄉之遺

城南韋杜舊通家喬木消湛亦可嗟尙識中丞埋玉地  
石人橫裂石碑斜

東潛以予修學案購得直閣遊公景叔墓志見示

張公芸叟之文邵公鯨之書章公粲之篆而安

民所鑄也題詩於後



關陝淪亡後橫渠學統湮呂蘇僅著錄潘薛更誰陳石  
墨何從購遺文大可珍邵公亦五鬼鴻筆壯安民

讀方子留詩

不波航口水茫茫東丹山頭雲漠漠百年哀怨未消殘  
一卷遺音疑可作布衣何事與國家志士不忘在溝壑  
平生許劍愛勾餘墓樹西靡應如昨我歌大招詞足感  
橫江鶴所惜夜悲歌十九已淪落

南湖觀張功父像

張郎真將種不獨數詩宗一擲事幸濟終身願未從象  
臺消壯志蕭寺撫遺容寂寞南湖上風流宛可逢

觀潮同鈍軒

揚波相國伍重水大夫文白馬新來者遙知顧令君見董

戶部德  
僂集

前過京口銀山得詩二句而未就乃續成之

廟中雷震斬王鼓岸口灰飛老兀魂聞道金山但坐嘯

曾無風鶴共追奔以銀山為金山近日  
閣百詩始辨正之



鮎埼亭詩集卷第六終

鮎埼亭詩集卷第七

甬上全祖望紹衣著

谿上後學鄭爾齡校刊

。葉子詩三十六韻

以下漫興集

葉子始何年始自唐中葉姓徵北里人藝登南部笈器  
以投瓊爲制與選格叶後主暨思公位置各妥貼鄱陽  
馬竹村著錄時代接降而至殘明新箋變摺疊區分署  
誰某半出江湖俠三十六英雄曩者擬荆聶自經稽仲  
招游魂都被攝何人慕流風借以資漁獵我生於此道  
茫未窺藩堞但從壁上觀心訝且目瞞如何不終朝轉  
戰累百合正位首分班計獲必數莢禽縱或異宜前卻



或遞躡盪鋒或爭衡薄險或見壓責償或示懲連衡或  
用夾或交綏而回或設窵以斂或利在壯往或戒在陵  
躡或黠在隔垣或昧迷目睫忽然六緋臨亦象擲臬捷  
得喪固無常吉凶難豫揲要須乞井公多儲質錢帖我  
讀五行志妖徵漏史牒神廟之末齡女郎偶日涉其名  
祖金龍其戲止妓妾相傳有馮生濫觴啟其築波靡當  
思宗薦紳爭拈掖荆谿最所耽藉以了相業四友暨十  
亂當年尤欵洽見吳農祥嘯叟集謂馮猶龍也直廬正沈昏廟社已血  
喋馬阮竟乘時江南禍淪浹搶滿語不祥順風兆竟協  
長箋竟成讖卒兆渡江檝垂末產吉翔滇王復遭蹙禮

經馬從馬乃爲此輩狎楊郎序早徵杲老傳足懾小技  
關興亾感懷幾心悒諸君方確鬪莫笑吾啖啖他日圖  
譜中定堪補故篋

對菊食蟹三十二韻

東籬逕乍開東海物惟錯霜螯碩且肥霜花寒不削其  
字曰延年其族曰郭索晚禾入椴新宿土貯盆昨風吹  
老艾翻潮退涼蒲縛應月脂滿匡畱春葉遶脚夏正紀  
最先周易象非鑿雄雌視臍分濃淡列種各古心靜可  
親堅甲利用斫吾友多閒居新冬感寂寞插之旣滿頭  
臠之在取獲於焉俱微吟相於成大嚼惠分京兆貽莎



自天隨柞九日雖過時泥飲亦足樂畢公直老饕陶令  
雅清約南山望遥遥左手持矍矍莫用何生糖或入桐  
君藥問性兼甘辛流膏叅丹虀涼宜調薑下香堪和茗  
瀹薦枕良所欣爲胥俱不惡一朝兼二妙詩思紛旁魄  
羞道涉江枝詎數披綿雀餘事及古方致用更廣博所  
訝漆可投猶喜渾弗涸治墻術莫諳召鼠事近謔蔡謨  
尙諦參葛洪休臆度以菊洗蟹腥以蟹爲菊醪采芳思  
幽貞撫形發嗚噓四界踈寮遺二經簞谿作掌故出吾  
鄉文獻未荒落黃髮我自憐桀步誰相攫吟罷偕厲生

且跨揚州鶴

是日與樊榭同  
爲邗江之行

月夜唐棲舟中次樊榭韻

霜花霜葉環江城夜明如晝送我行生民水旱大可念  
故人出處尤關情

時樊榭將謁選  
予力止之未得

三千卷書壓艙重五

十里水聽櫓清東方漸白殘夢醒荒鷄似爲客子迎

溪行欲與樊榭遊烏鎮東西二寺不果

緩棹出烏鎮遙山入望稀清流染晴色穉麥幻春暉河  
女留魚賤僧寮訪古違五湖堪極目浩蕩白鷗飛

吳江過接待寺和樊榭

拂天喬木古有客訪三乘帶霧過枯澗叩門多遠僧鷗  
分午餘飯雲護宋時燈此去臞菴近居人識未曾



茶塢約與余同渡江訪嶰谷中途聞其爲蔣山之  
行且將東下由洞庭七十二峰之西湖於是茶  
塢停橈吳市以待之而予先發訪半查

五岳初心未易酬江東巖壑且清遊人生能著幾兩屐  
此樂堪輕萬戶侯莫御孤鴻追後乘還尋一鳳到西頭  
初冬天氣初春似到處題詩定滿郵

沈君飲谷有一研作蓮花相其北波濤甚雄湧上  
題梵宇故倪高士物後歸文待詔者而莫知摹  
本所自出予謂此潞洲洛伽山景物也因名之  
曰小白華研而系以詩

寶陀十丈妙蓮花花外洪濤湧海霞人向蛟宮參瑞相  
君從鳳唳據清華風流知自停雲館津逮須憑犯斗查  
肇錫嘉名今日始東林東老亦堪夸

惠泉泉之良也惠泉釀酒酒家之重臺也漫吟一  
絕以爲惠泉解嘲

是誰招麴氏重爲此泉羞出山原已濁何況過糟邱  
。張文貞公青山莊

相公投老地魂魄戀平泉昔我經過日猶當克世年曲  
池原不改高閣故依然獨有巢中燕驚心夜未眠

呂城



魚塘亭詩集 卷十  
半枯不枯著色樹欲凍未凍借春天寂寥小雪昨夜過  
一甕芳露孤舟前

曉渡揚子

歷亂紅船西復東江豚挾浪舞空中人間如此風濤盛  
一葦金山豈挂胸

明梁谿邵文莊公溫研歌

道南薪火長熊熊魁儒研席生春風鄒胡王尤世所宗  
清泉流出墨瀋濃歷三百年誰嗣蹤曰故尙書二泉翁  
士夫道學罔朦朧以日格子震羣蒙重光麗澤大有功  
黍谷一夜元雲封講堂清供出三冬巧裁紫玉架青銅

坎離互宅凍可融不須吹律聽黃鐘緹室居然元氣充  
將無橐籥本叅同墨林安郎藝事工風流舊著宏正中  
勒名銘尾志所從東林茂草今茸茸顧高錢華不可逢  
寒灰孰然涸孰通飄零故物如轉蓬撫茲遺器宜敬恭  
願爲真士夫莫爲僞道學文莊  
訓學者語也研爲安國所製

詰士聞予將至揚留所購滄酒見待

十年不接麻姑釀橫海春光夢寐餘好事更誰千里致  
多情爲我一尊儲舊聞幾憶長洲老絕品宜魁曲洧書  
正值江村黃葉滿旅人乘醉滌塵裾

慕廬先生論酒遍  
天下每以滄爲第



。嶰谷生辰爲其先太恭人下世之日每歲必哭墓  
下今年六十慧田約同人以詩慰之

祝歲原非禮兼之抱恨多寒泉彫齒髮老淚寄蒿莪子  
卯猶爲忌庚寅更若何我辰亦荼苦於邑不成歌

明高邑趙忠毅公鐵如意歌

不如意事常八九安得袖鐵長在手黑雲蔽天夜沉沉  
神龍孤嘯怒蛟吼高邑先生望斗杓熹廟之初長六曹  
四凶縮頸甘鼠伏同心同德憲府高其奈鴟鴞在宮府  
翼以乾兒稱五虎可憐詔獄產神芝坐視清流色慘沮  
鄭草空勞厲刃須朱游那得賜劍誅酒酣一擊唾壺裂

太尉之笏同欷歔彼喪心者喬氏子國狗之瘕類不泚  
玦未及玦環未環老臣竟以荷戈死潦水旣盡見清潭  
忠魂箕尾分左駮寒芒正色足千古一枝手澤落江南  
我猶記讀先生集洪河千頃波起立是物曾陪函丈間  
昕夕或歌還或泣嶰谷山房清玩多重陳舊史同摩挲  
茂陵玉盃人間出未若孤忠故物長嗟峨

聞嶰谷已至吳門

昨報元裳鶴隨君下洞庭新詩知不少舊屐半曾經黃  
爵松陵出鱸魚木瀆拾江濱應念我遙指數峯青

南圻遊攝山得宋儒遊文清公嘿齋題名于苔蘚



中洗而揚之

乾淳薪火紹湖湘白下登樓有漫塘多少遺書都泯滅

誰尋心畫到荒岡

嘿齋從宣公于長沙及官秣陵得漫塘為高弟

宣窰蟋蟀筒為半查賦

幽詩床下物一旦陶穴居器傳明初葉古色猶斑如此  
非堯遺風我為思瞿瞿

鬪菴里巷戲濫觴自鬪鷄乃勞好事子為之謀幽栖其  
嘿足以容丈人悟息機

當年老甄官薄物不枯窳呵護到微蟲珍重叨藏弄  
鷓見之嘆予獨憂風雨

鳩研

亦飲谷物前在吳門許為作詩今寄之

祝鳩以教孝尸鳩以教慈夫君蓄學苑不徒經師兼人  
師降而餘事乃文詞

鳴研

右軍籠鷲歸化作印泥石夫君閒試畫沙文我當為鶴  
助軍力

吳興趙文敏公番馬軸子

丹陽李氏所藏

當年十國觀東都王會曾傳天馬圖竟聽西樓釀封豕  
馴教南燼困雄狐角觴忽為新朝出振鷺誰憐舊社燕  
愁絕淮東老龔勝揮毫兒背淚先枯



寄張靚淵于京師

三餘草堂清離離插架萬卷足自怡老生抄詩未卒業  
 寄君當歸莫濡遲東華軟塵十丈餘何王之門堪曳裾  
 草堂夜鶴怨蕙帳北風其涼盼南車予續選用上者舊詩多得靚淵之力  
 未及成編而靚淵匆匆北行

唐里陳疇種蔬卷

其氣韻蓋元人也而盡苑失之

野萃場藿上生綃沍露凝霜品目淆我亦披圖思土物  
 山中赤堇水中茭

彈指閣小集胡都御史復齋喜予之至而念嶰谷

遊洞庭未歸各賦七言

芒鞋猶帶石窓雲隔歲離棕話倍殷蛩歷心原千里合  
 馬牛風訝隔江分南州楊在還重止北海樽開正晚曛  
 此夕漁陽山下客題襟誰與共論文

寧守杜君過揚來詢里社近狀

勾餘一片土疇昔最清嘉接葉詩書澤連薨公相家鮫  
 人富蜃蛤里井擅桑麻七觀遺文在其言未是夸  
 到今無恙者獨喜有山川梵宇矜三佛仙經重九天過  
 雲仍冉冉飛瀑故濺濺樂事輸猿鶴居然太古年  
 憲斂遺編重文元教術淡古窰宗正宅困學尙書林帖  
 括拋天爵科名錮道心而今併蕭索蕉萃幾華簪



元氣胡爲耗潛消市舶中頻年添客戶百貨釀淫風物  
 以通商貴民因逐末窮更堪加稅吏悉索繭絲空  
 甚矣衣冠蹇長聞胥隸尊虎狼多奧窟雀鼠有旁門士  
 氣何由振官方未可論剪鉏非易事奚以劑深根  
 大府行臺建諸軍紛錯居所虞啟奸宄其患被鄉閭庚  
 癸如聞警桂符豈可除感懷在近事城火與池魚  
 江湖分表裏隄隄惠民多黃鵠謠應念犀牛石未磨閒  
 情及洲島餘事足弦歌一自履齋後時亭誰復過  
 舊聞胡副憲雅道使君才三輔邀殊擢江東怨暮來班  
 荆值歲晏拭目盼春回我亦遄歸近相期探早梅太守爲吾

友胡撫軍復齋中表姪

董生秉純吉夕貽書求詩

遠聞奠雁結縈日太好小春紅葉天佳兒佳婦定難得  
 正身正家豈偶然關雎已識諛諛累弋雁還期警戒先  
 孝弟柳家稱醢醬不須艷道玉臺篇

連夜不能成寐竹町以爲虐用其心之過當靜攝  
 以治之予是其言而未能從也

故人憐困悴密授試心齋莫以咸膺感而令良背乘槁  
 梧良可羨野馬未能諧昨夜鯨鐘動瞿然繫我懷  
 泝江編修以病後謝客浹旬不赴詩集然竊聞其



有納姬之喜非疾也

誰傳玉臂貫銅青  
閒侍維摩夜講經  
莫向劉楨長作誑  
須防排闥到中庭

畚經堂夜坐念嶰谷

黃葉且落盡  
主人尙未還  
昨傳西歸信  
已道發寒山  
連宵好月色  
泠泠屋梁間

或勸予乞靈於醇酒以求寐亦不驗

六鑿紛綸動春今  
非我春縱然沉醉後  
猶是獨醒人  
夜雨瀟瀟下孤燈  
耿耿陳杜康  
新喪職無力濟枯津

題顏公茅山立靖先生碣後

臨潼張喆士所藏

江都老道士姓字  
佚圖經一卷太師碣  
千年勾曲銘  
高文寵地肺結習  
在仙靈辛苦雪溪客  
長留墨妙馨碑已  
仆茗  
人沈君扶  
而出之

嶰谷至自吳下同人集于晚青軒時予將歸

一卷東遊草篇篇總絕塵  
尙含楓葉冷已見豆花春  
合并良非易離愁又轉  
新人生如泛梗得酒且逡  
巡君語  
予天

池山下豆花  
已放異事也

半查子振伯入塾

類我類我阿翁祝可兒  
可兒執友期叢書樓中  
萬籤軸供養崑山玉一枝



南圻餽藥

拜受百丸藥於焉清踈心感君親和齊惠我過南金卞  
以中冷水侑之綠綺琴

方丈望谿嘗言以萬八徵君之學而惜不得如楊  
勿菴受日月之光以顯於時予謂是不知萬氏  
之心者矣因表而出之以論其世

四明上溯滌陽胄風虎雲龍三百年一出祗緣爲庀史  
終身安敢望朝天誰將客婦行吟苦漫作枯魚望澤憐  
試讀秣陵遺事句杜鵑心跡尙昭然

崑山京江兩相公薦疏已具先生以

死力辭

陳仲醇小像李是菴所繡也爲半查賦

是菴圖繪好繡絲乃更精恍然三江上見茲老鰈生槁  
項一布衣不脛馳高名萬古黃漳海巖事與心傾得此  
定非易乃公未可輕翻多所著書身後受詈聲馬郎真  
好事高閣懷孤清風流感妙術珍重爲多情閑將玉露  
酒相對酌南榮一枝早梅花潔供在膽瓶

次風學士去年索詩未及致也客中寄之

十年相逢一握手蕪城惜別援清琴日飲醇酒諒無益  
獨抱遺經空有心應憐倔强還猶昔不道沉吟直到今  
聞說承明邀盼昧匡時何以漑魚鬻



偶與南漪語及科舉之害

百世遺經重誰人敢代言安思作嚙語何以溯淵源  
淺精神傲揣摹心術護活埋天下士昏墊不堪援

蕙田扶疾渡江訂予同行予疾更憊弗能也蕙田

既發雨大作

漫天風雨客心寒此日念君行路難酒醒夢闌聞獨雁  
孤燈花落五更殘

除夕梅圃以吳于蕃管聖一二丈殘集至挑燈讀

之為補入者舊錄

萬歲名何寂寞一片心未瞑目幸得之是亦足歲寒人

挑蕙燭

戊辰元夕芍庭以其世父忠介公生辰為蒼水先

生祭即用蒼水過忠介琅江殯宮韻

以下漫興二集

淡旬春色碧於油崧嶽神靈在上頭丞相尚傳弧矢怒  
中樞誰寫蕨薇愁冰槎客散重脩祀芍泚堂前續紀遊  
落落通家幾子弟隻雞猶克溯弓裘

故國當年事未灰五千甲盾傍江開卧龍伏鳳成羣出  
鯤壑蛟宮取次陪一自遺民湛絕島更無過客上西臺

琅江死別吞聲後重見南屏白馬來

董四梅圃寫入山圖索賦



世路日局促志士思山居曳杖入深林良足恣所如四  
窓九洞天列仙所卜廬塵氛飛不到清景樂有餘二十  
里過雲南北互縈紆我亦淡神往逝將與之俱所愁經  
世志何當竟逃虛感之不成寐披圖重躊躇

元巳前一日之行省甫出城十里風雷大作泊高  
橋再宿始行

天豈有不祥動威加祓除下土蟻蝨臣一葉阻沮洳前  
村杏花好墮地嗟淪胥聊復烹江鱠爲醑劉相如

山陰求韓蕝山家傳不得

魏王好孫枝葉葉長儒林如何喬木盡世本都消湛猶

餘帶草綠喟然傷我心

寒食日至行省過葭林爲予盛言甘墩看桃之樂  
而惜予至之晚因讀其紀遊詩

我家細湖上桃根夾岸栽日昨解維時正及滿堤開一  
爲飢火驅勝遊動輒乖嬌兒惜我別花下幾徘徊連朝  
惡風雨萬紅摠塵埋故人喜我至軟腳斟新醕方知是  
寒食禁煙凍廚齋爲言甘墩遊惜未吾子偕有詩宛如  
花春思與墨諧人生曾幾何陸陸困黃埃明朝定晴霽  
新綠尙可懷且共扁舟去扶醉六橋來

樊榭有南屏燒筍之約日雖雨無阻詰旦竟雨予



弗能赴也

及時燒筍正不俗況有花豬恣大嚼此樂固應天所妬  
墨雲沉沉來作惡老夫卽次悵蕭寥呼童買筍且永朝  
出山入市風格減冒雨莫怪諸公勞生平雅志慕幽討  
其奈陰晴稱心少山靈定笑人無勇此間清供雨亦好  
雨霽同人集南屏補燒筍之約分韻賦湖中新綠  
誰洗繁穠淨晴光放滿山三春無此日積翠乍開顏天  
入重湖碧人依淨域閑時聞黃鳥唱深處度緡蠻

鹿田太守問予不出之意何其決也笑而答之

野人家住鄞江上但見山清而水寒一行作吏少佳趣  
十年讀書多古歡也識敵貧如敵寇其奈愛睡不愛官  
况復頭顱早頽白那堪逐隊爭金襴

健忘日甚東東潛

有書不借乃一痴借書不還亦一癡誰翻千古痴人案  
此言吾得之劉祁老生疇曩頗強記十行並下無留遺  
君家牙籤三萬軸更還迭借奚童疲此中樂處真不少  
飢可忘食寒忘衣秦火以來亂穿穴諄諄出出遊心脾  
誰其爲我營複壁留此焚餘存幾希與君曾笑西人妄  
元珠腦後珍重携豈期未老遽衰索收視返聽恐已遲  
冥心從此竟坐忘還耶借耶都支離



東幸詩

七百餘年玉檢出五十八盤石磴雄太皞連朝召雲雨

恭迎翠輦入神宮

撫臣槎山開道得宋真宗時玉檢進呈

帝出乎震長六索人生乎寅昭三微先皇奎墨映星

斗元氣淋漓露未晞

出震生寅聖祖題泰山祠中語也

梁父亢父貢方物日主月主朝明堂一遊一豫膏澤沛

大東小東勞可忘

和風旭日護慈寧夾道春暉効百靈七十二君圖錄盡

更添 姒姒寵山庭

葱葱佳氣集聖林蒼莖楷幹長十季四氏諸生齊入覲

是誰來獻孔融琴

甲子仁皇東巡行聖公進孔融琴右軍樂毅論墨跡唐揚聖教序文同

墨竹及周筮

周廬如櫛次青齊華蓋連天日觀低不道帝車東指

近相星翻落浙江西

時二相讞獄于浙

大明湖頭黃幄駐飛瀑泉邊朱芾來海右驚傳浴龍地

當年邊叟讀書臺

直沽春色浩無涯漕楫呼嵩次第排一路牙檣飄錦纜

不須六月過長淮

樊榭北行

爾才豈百里何事愛彈冠魚釜良非易繭絲亦大難瘦



魚...詩集 卷七  
腰甘屈節薄祿望承歡倘有清吟興休從簿牘闌

苦雨詩

春水縣連不可住轉眼驕陽定足慮斯人困悴無生趣  
六龍聞向東方駐我欲陳詞到日御急鞭羲和殺雨勢  
嗟乎二麥三蠶半天瘵

浙東使至爲言渡江卽苦無雨不知西渡之滯溢  
如此也

浙西苦潦水浙東苦旱乾水甚渰麥死旱甚種禾艱三  
江一葦地頓爾戴各天老生長咄咄非爲一身飢與寒  
○會葬谷林

故人投骨南山隈風篁颯颯傷我懷當年蠟屐同遊地  
一慟今隨白馬來

卜隣喜得近詩材勾曲山人齒髮偕懸知朗月明星夜  
連臂清歌接券臺

偶成

紅藥當階百媚生幽窓相對共神清平頭奴子忽趨告  
故撫銀鐺被逮行

端午前一日遊北山葭林處泉甌亭竹田分韻

頻泛晴湖棹南山又北山天中思益智人外足消閑灌  
木連雲綠殘陽逐水彎支公聞客至一笑啟禪關



瞿將軍行

以終其身

瞿天葵應天人起自行伍為都司狀貌甚偉史閣部所拔也亂後守閣部之閫

揚州閣部死乏嗣中權都督紹絕祀蒼顏黃髮太夫人  
 秣陵僑寓邀廩賜桓桓更有瞿將軍魁岸曾蒙特達恩  
 彎弓未殉沙場血倚劍時傷國士魂梅花嶺下故人散  
 寒食年年澆麥飯鷓鴣恥向別枝栖依舊長刀守舊閨  
 吁嗟乎廟社重門主管誰蒿萊狐兔紛可悲疇昔邊關  
 一老罷今拋鎖鑰竟如遺天為孤忠留戶牖幕府殘年  
 衛大母虎頭猿臂故依然精衛心期終不負中權都督  
 亦蕭寥相與擊竹歌楚騷孝陵松柏森森動時有朱鳥

門前巢當年上將推劉乙駢首不辭肝腦裂死生異跡

寧異心誰采舊聞神史闕

中權謂史懷威也

都城正陽門西大士祠予向嘗遊焉近乃知為故

明洪督師祠也

當年諭祭十三壇東向招魂淚未乾歲晚遼陽訝歸鶴  
 須眉猶是髮膚殘

松杏淪亾罪豈輕纍臣分應死危城偷生視息非無為  
 欲報吾皇香火情

頭顱業已付歐刀誰料風雲自此邀十月功宗酌元老  
 叢祠只合化僧寮



杜守調任越中

之官勵半載涖政未三旬 天子眷龔遂吾儕戀寇恂  
扁舟四窻下薄餞十洲春猶喜提封近甘棠接比隣  
歲歲聞移節翻添廉吏貧心原清似水甌且冷生塵誰  
道二千石曾無三百困看君洗手去寧怪典衣頻  
山水推於越雄藩重守臣耕漁舜江舊弓劍禹陵陳不  
振王劉學羞稱種蠡仁閒情消退食河女獻絲尊  
十年鉏菜老長被長官嗔一自雙旌至周諮百事勤風  
高孺子楊花識白衣人何日邀琴鶴重臨故部民  
歸家見齋前竹實有作

鳴鳥諒不聞竹實胡爲者主人媿弗堪聊復采盈把平  
生藜莧腸一飽百憂舍歸裝乏鞠藭隔宿儲亦寡何期  
邀此君餉我以大雅或曰歲且禋飛鴻行遍野憂心夫  
如何徘徊桐陰下

蒼水先生墓道漸湮道士吳乾陽謀修復之和鈍

軒韻

一區發鳩巢千年夸父宅豈期世外人而念此窳窳在  
昔正氣歌三分席自擇紀朱張萬沈相與成勝跡峩峩  
南雷銘光照長虹白白久久未開雕貞珉眠荒陌我續第  
二碑遺事吐格格一從小跛叵莫問南屏魄何家新貴



瑩祁連肖層碧應憐寒谷中隻輪獨運策編詩錄許劍

諒屬我之責

紀九峯朱穆生兄弟張文嘉萬充宗父子沈橫書呂東莊浮屠超遜

我聞形家言茲邱真吉宅渺渺流泉流藹藹夕陽夕天

定妥忠魂楊癩不及擇他年萬香火鄂王共靈跡冬青

花未開我亦已頽白中為颺颺居旁為狐兔陌翩翩有

羽衣高情見風格朽骨尙關心何況此毅魄

吳君方埋枯骨于南

屏當年雪竇翁茲山先埋碧丸土不可尋誰為問故策

行當更訪求與君共此責

謂魏山人耕也

雙韭山房夜話示董生秉緼秉純兄弟

少而學道老無成忽忽浮湛度我生豈有朝簪還入夢

每于時事尙關情笑看雙鬢知黃落渴願諸公奏治平

太白乍傳臨井紐不禁中夜倚柴荆

買舟渡江

何日勞人許息機水雲深處結柴扉閒栽赤堇青櫺遍

醉啜黃魚白蟹肥戶給不妨扶杖過花開都插蒲頭歸

臯夔事業知難就此樂誰教天亦違

不寐苦熱

赤龍竟夜炙南天我最薰心不可眠無奈蠅蚊百輩至

試為鸞鳳一聲傳炎雲直欲枯星野古井徐容試冽泉

太息斯民困飢火縱臨枕簟亦焦然



魚塘亭詩集 卷七  
南鎮命祀

日觀峯連越觀峯東巡秩祀應相從書開宛委山頭秘  
雲發陽明洞口封樂府併陳小海曲湖波不鬥大梅龍  
使臣更有恭祈事早望西成慰罷農

若耶谿竹枝詞

上山試采叢山戢下山試種蘭亭蘭勾踐霸材淪落盡  
西施手澤未曾乾

鴨腳尊生春水綠鹿角芟出秋波清任教木石心腸硬  
未免低回移我情

白楊梅熟甘于蜜郎若咬時莫傾筐爰精噓出鼻端火

失却鏡湖五月涼

雲門寺前萬壑流褰裳爲放木蘭舟試看臨風傾城笑  
如何勵直三年留

塗脂抹粉失眞色浚掃蛾眉賦冶春社前日鑄初茶出  
手製雲牙一百斤

朝過梅墅暮楊塢到處花船有笛聲誰道風流傷盛德  
只愁無價覓梁生

謂梁少碧

殘山剩水陳老蓮祇爲紅裙著墨鮮故居青藤已半死  
尙有焉支生墓前

道墟舟中望甬山



越州之水如鏡清宵分偶爲道墟行中田歷亂飛流螢  
 不聞人聲聞蛙聲新芙蓉葉大于蓋扣舷而歌何泠泠  
 舟人遙指傅山近喬木十丈叅蒼冥侍郎講堂高尺五  
 少宰格重席曾傳念臺經星移物換此事輟異軍化爲  
 菴先生蒼頭營火攻都督亦健者少宰族子欽臣字朝憲死于戊子愚公那得  
 與山爭沙蟲猿鶴共一嘆不知幾度驚山靈侍郎飄然  
 蜚遯去首陽故址傷我情年來四海爲家久高陵宿莽  
 連雲平但見稱心寺宇遙突兀暮鐘徐動梵火明何來  
 寒芒赤于電將無大金夫人之神燈卽朝憲夫人也詳余若水傳

東浦舟中

平生慕賀鑑老欲往山陰高尙夫何有清狂或嗣音曾  
 聞曲水地向是少師林故物祜田在幾時遂此心先少嘗以蘭亭爲別業見剡源集然非今之蘭亭也

曹娥廟碑

云何黃絹碑重書自元度翻爲孝娥羞江潮洗不去片  
 石豈宿緣蔡氏多掌故

秋勝處泉以予至各有宿留之約予謝未能也

白髮青衫有素心相逢一笑共披襟浙東耆舊晨星少  
 吾輩交情碧海深正欲對牀消昨夢其如畏暑廢清吟  
 諸公及早成蓮社待我重來話竹林時處泉欲舉詩集



重定黃氏留書

證人一瓣遺香在。復壁殘書幸出時。如此經綸遭世厄。奈何心事付天知。猶聞老眼盼大壯。豈料餘生終明夷。疇昔薪傳貽甬上。而今高第亦陵遲。

大蘭湯使君山行

官重三都尉。人行九洞天。太平無伏莽。仙吏賦游仙。大蘭

為四明二百八十峯要害地。故防府實兼轄寧紹台之境。

同年姚君祖述出示家傳因屬重撰墓碑

峩峩少保昔專征。坐嘯能招橫海鯨。仗劍近臨歐冶地。受降遠度荷蘭城。勞臣報國天誰障。功狗攘封眾未平。

勛策到今留秘篋。文孫何以振家聲。少保招來之後。皆為所掩。是非予一家之私言。閩人皆言之。

七鯤身畔紀穹碑。楊僕樓船未足推。樵牧不貽賜姓媿。

干旌頻為幼安馳。孫枝如爾真梧竹。先烈歸天壯尾箕。試向石渠諮信史。平淮莫用段家詞。故太僕斯菴沈公居臺二十餘年。少保欲送之歸甬上。而不果。後竟卒于臺。

曾聞跋扈少年場。家具曾無擔石藏。元霧一朝傳豹變。

炎雲萬里破龍荒。澎湖毒浪先歸命。越絕神山並有光。為卜高門終復始。請看喬木蔚生香。

遊天章寺遇王布衣自言修竹先生之後



犬年羊月吁可思。穆陵頭顱飛上樹。爾祖挾客居山中。  
 老淚汎瀾不可住。山南七戰幾危疑。竺西雙匣誰呵護。  
 豈意斯地有神靈。鳳穴于焉成權厝。連袂閩甌數白衣。  
 哭罷揮毫賦長句。爾今拓落一布衣。又視蓬萊淺幾度。  
 雖然燕子已他飛。尙有鷓鴣守未去。獨恨梵屋潭潭金。  
 粟荒蘭亭真帖莫知處。

鮑琦亭詩集卷第七終

鮑琦亭詩集卷第八

甬上全祖望紹衣著

谿上後學鄭爾齡校刊

望谿侍郎以舊冬辱寄文抄兼令覈審未及復也

度夏於越乃條上數紙附之以詩

以下望歲集

一編幾洛誦高蹈更誰京經術老逾篤文詞明且清低

頭拜腐史放眼笑班生尙有葑菲采他山礪錯情

侍郎不喜

班史及柳儀曹集聞者多以爲過至以馬遷爲聞道亦似浮于其分而侍郎守之彌堅莫能奪

謬種橫流甚何時得廓如試鳴塗毒鼓更指越裳車斗

柄依然揭榛蕪定可除羣兒愚不揣毒霧尙狂嘘

昔年萬夫子一見輒知音我亦四明客同懷千載心蹉



跼憐病驥蕭瑟嘆焦琴湜籍方僵走何能効砭鍼

吾鄉萬八

先生季野首識侍郎于少年勸以從事經學勿為無益之文

○寄訊故撫軍常履坦時方遲秋于西曹

當君開府日我最罕經過為避猪肝累兼之箕口多高

牙今已矣舊雨近如何剩有山中客神傷春夢婆

撫軍待予

甚厚浙東屬吏因爭下石撫軍不之信嘗私以告草塘通守鮑辛浦令予知之

浙水膏腴地頻驚貫索臨方知難寡過恨不早投簪被

謫應蒙垢搽戈亦負心請看掃門者告密去如林

撫軍為故

吏所告雖不盡誣亦不盡實至反噬之風似亦不可漸長

聖主恩如海容當宥纍臣他年終結草此日望生春幸

或克城旦寧辭贖鬼薪金鷄如有唱白髮拜深仁

雪舫分司同年獄中有詩成集其送萬生幼揚還

甬上寄懷甚殷未及荅也至杭荅以三首即送

之東行

萬氏吾通家襟襟十世遙其暨九沙翁尤稱忘年交道

山騎鶴去零落嗟小喬周郎真健者詩格如青瑤翩翩

衡嶽秀來看浙江潮坦腹知佳婿分符得劇曹西華正

苦貧藉以資蘭膏才大應得屯一跌遂飄搖羝羊既觸

藩旅鳥旋焚巢反噬一何毒捫心非所招菰蘆幾故人

聞之共魂消之子乃閒暇旦旦拈詩瓢縱復慚柳下不



肯祭臯陶驥然笑髯翁湯火浪悲號五月萬生歸來訪  
蔣逕蒿爲言對簿者相念每連宵我方愧橐餖何以報  
木桃感之不成寐中夜空蕭騷

初秋我渡江與君重相見痛定幾低回噩夢寧須信投  
杼應遭疑祝網終蒙眷竟逃人鮓甕且挽沙場紫披讀  
近日詩一過一稱善渾忘左徒憂不作宵雅怨更喜有  
哲昆在原遠急難詩力雅相當強兵迭挑戰豈期對床  
約飄泊在狴狴采采蠲忍花連枝何婉變乃知真性情  
多得之憂患我亦罷鬱陶重理舊詩研

關東沙磧地從軍定可矜雖然困遠役所喜在更生况  
復近豐鎬咫尺瞻舊京邊塞互蟠結山川有神靈尤聞  
富物產碩大不可名寒則擁狼裘饑則啖駝羹渴卽飲  
涼酪暑卽踏層冰逐臣省愆暇足以發詩情故人謝侍  
御荷及曾此行貽我書一編他年補圖經石林儒者所流  
寓文獻于焉徵窮荒列戍卒撫循責匪輕但能卹薪楚  
卽以報 聖明賜環諒不遠著錄尙早成

病中突接辛浦通守彌留之書爲之一慟來書此番一病

竟入膏肓從此長辭左右化爲異物非所料也  
畢生偃蹇無可紀錄惟捺履粗堪自信吟咏聊  
以自娛寂寞身後幸惟先生  
是賴伏枕哀鳴泣然絕筆

魂斷何能哭寢門開緘未竟已吞聲孤燈伏雨雙淒絕



魚長亭詩集 卷八  
細看模糊病墨痕

悲秋我已化龍鍾  
眠食支離百感攻  
不料爲君添涕淚  
夜窻於邑和寒葢

冰霜節掾干夫特  
玉雪才華萬首盈  
二語早堪作自志  
了然撒手盡生平

廿載交情澹暮雲  
豫州知我最殷殷  
東平墓樹休西靡  
已撰穿中石柱文

訪秋分得玉谿詩中吹字韻

吾意正蕭瑟  
况逢秋半時  
誰家臨水處  
定有拒霜枝  
日落烟花淡  
風涼衣帶吹  
東城多野色  
病叟亦忘疲

啖齏又病

儂家東海上  
束髮饜霜螯  
一旦能爲厲  
從今慎所遭  
不關爾雅咎  
還戒畢公饜  
誰說飛仙秘  
長生漆漫勞

中秋約與葢林爲小集  
雨甚不果辱有酒饌之貽

賦謝

積雨阻良覲  
多情有故人  
挑燈招海魄  
叩戶到兼珍  
夙解觀願繇  
新知動指因  
差堪傲杜老  
杯炙愬酸辛

題寧人先生神道表後

志在規恢四十年  
老投華下聽啼鴉  
可憐閒卻支天手  
餘技猶能試計然



岱恒嵩華行踪遍恥以浮言當說鈴問誰同此佐王畧  
除是剡中黃負苓先生嘗曰待訪錄與日知錄其中同者十之七

吳下風流脆薄多先生天畀自差峩疾藜烝好黃精熟  
便唱休糧秘藏歌

貞孝墳前四柿樹寒芒終夜燭南州直待魂歸臯復後  
攀裾重與慟宗周先生有貞孝墳前四柿詩

庾郎蒙面賦江南柱國家奴更負慙一灑諸公入關辱  
峩眉六月雪生醜

○樊榭至津門而歸  
慈親年八十捧檄已非時大有陟陔樂長吟投帚詩悲

秋笠澤鱸招隱小山枝興盡翩然返從今保素絲

將赴葢山講席杭之同社諸君集餞南香草堂得

東字以下采葢齋集

安陽世學山齋重五百年餘屬起東試向清江覓寒火  
更叅新會溯流風日來帖括司儒苑誰是真師震瞽矇

珍重諸公尊酒別何時蘭上共詩筒韓貫道父子五世講學山中清江劉

子澄高弟也而近人無知者專屬之念臺先生

○葢山瞻雲樓有大士駭而去之

東西隣比紛禪榻又復巍然踞此牀不讀佛書良寡陋  
若行卿法恐荒唐學儒自笑生天晚禦侮爭傳碎鉢忙



安得證人昌墜緒海門弟子息狻猊

○臥龍山與蕺山一東一西稱越城入山之最府署

在臥龍書院在蕺偶東補堂

臥龍山色化興龍領袖千巖棠蔭濃我亦寒瓊飫西爽

與君分據一奇峯

聖祖南巡勅改臥龍為興龍

大士既去迎子劉子小影供之

已知非族得驅除陟降英靈喜廓如敢道登堂許私淑

修吾書更護吾車

○釋奠子劉子祠下前此未有之禮也

尚有講堂在依然帶草滋是誰通小學未易謁先師木

末花開日江頭稻熟時破荒陳俎豆蘋藻一歆之

子劉子有

古小學記

故太守湯公篤齋有大功于越中而專祀已圯今

祀于書院中同補堂賦

經術經世務方可見施行在昔胡安定治事標齋名湯

公涖於越如梁西門豹秦李冰城西三江口洪流時震

驚朝潮夕汐恣憑陵菑畚耕獲歲不寧五馬翩然來下

車蒿雙睛俯察地理仰天星妖魍絕命狂瀾清東眺有

它山梅龍或與京斯民左饋右粥到今仍豐盈三百年

來祠宮傾聊從講舍薦明馨黃蕉丹荔依諸生諸生讀



書貴有用豈徒咕嗶夸精能天何以平地何以成六府  
七政資講明我詩譜神絃雅歌神所聽

偶見子劉子私印曰叢山長摩挲久之

當年嚶嚶叢山長提唱三關曾幾時正學于今成絕學  
經師未易况人師先生定嘆薪將盡後死慚稱文在茲  
手澤尙傳私印舊應同禮器鎮山祠

朱綿之解吟軒當叢山之左念臺先生主講地也  
今爲比邱所居

百年帶草化茅蹊長夜孤燈對老尼到底寒芒猶未泯  
奎文時照佛幢西

○補堂謁六陵補祀謝臯羽王修竹鄭樸翁於唐林  
之次予告以尙有羅陵使不可遺也

啄粟靈禽志尾年中涓大節獨無傳願君分取冬青淚  
併弔同聲一杜鵑

訪購子劉子亡書

奠夫不作無休死試問遺書半不存倘許鑿楹無恙在  
定留貞孝涕洟痕

○遊大善寺

公手輯畢生今僅存十之五

賢乃叢山先生家無米歲從之貸有如寄每逾  
年子直則次年之貸又積矣如是者二十年及  
累官至太僕始有田二十畝得免貸予謂是僧  
能使先生與相緩急如是其久非聊爾  
之堂頭也而惜乎其名不傳乃紀以詩



魚...亭詩集 卷八  
苦節嚴夷跡孤貞嚴謝陶慙知老僧廩芝蕙共清高事見  
先生年譜成佛未爲貴知儒定足豪我來尋塔志莽莽但蓬蒿

敬題念臺先生手書

先生官司空時墨蹟也以當暑須借金爲塾師製紵衣告

其家

少師希聖學不勵在安貧一節見全體清風識古人尙  
傳手澤舊足爲講堂珍我亦鶉衣客門墻倘不嗔

始寧倪文正公新祠神絃曲

舜江兮湯湯夏湖兮茫茫太保陟降兮自帝之旁衣雲  
閣圯兮茂草荒太保東歸兮思故鄉百年恩命兮堂堂

墜典初昭兮日使君之臧三菁山高兮夜有寒芒

講堂兮峩峩諸生連袂兮鼓篋而歌誦兒易兮聱牙多

揚烏莫遇兮奈之何我欲畢業兮髻已皤前瞻金罍兮

五行星羅叅同橐籥兮地靈不磨太保揖讓其間兮臯

比時過擷蘋藻兮奠清波佑啟經林兮產菁莪

祠在始寧書院

中

啼鵑破涕兮一笑太保旣醉兮祝宗致告豈弟使君兮

神所勞直有功兮名教諸生讀書兮惟忠與孝枌榆兮

有耀太保行兮神旌夾道誰馨黃絹兮題墨妙

石家池當戴山之右亦念臺先生主講地也暇日



過之有作

子劉子之研池至今其水清漣漪東望采葢齋寒雲猶  
 栖依當年一壺砥中流殷勤浥注忘其疲是誰先登誰  
 未濟衣帶之近通聖涯漫天驚黨禍託孤之行亦殆而  
 敬伯真健者古誼直與王成朱震堪並馳矻矻服勤尤  
 所希幸逃躬隣厄卒罹桑田菑清流不救狂瀾危高弟  
 已先哲人萎年來春木歲歲苞其人如存道莫躋不若  
 鷗鳧俯仰自得遊化機敬伯陳堯年字也首事念臺于  
 講堂黨禍時念臺託孤于堯年  
弟子中以堯年與朱昌祚為最  
 密昌祚即解吟軒主也皆先卒

聞補堂遊寓山因祭祁忠敏公

落日曠園冷寒芒止水尊百年傳勝地五馬式清門尚  
 有藏書架為尋埋碧痕我尤念公子誰酬詩未招魂

姚江呂漢憲先生叔倫漳海黃公高弟也求其遺

文五年而未得里人亦無知之者

漳海正命後大滌山房空高深太傅之後有賢者獨抱

遺經不絕吟誰其為老伴何子稱同心餘杭何先生  
 義兆我曾

遊洞霄猶見帶草環帷林吁嗟杞宋文獻日消沈

過戴高士南枝宅

南枝先生蕉萃後誰為列名汐社中題詩桐江祭巖子  
 賣字澣關葬徐公固知正氣返天上長共殘山表越東



學錄定慚吾望漏偶來三逕弔蒿蓬

稼堂所作先生傳本未不甚詳予擬

搜其遺事另為一通而未成先生亦嘗從事念臺頃議劉祠配享弟子偶失之當補入

。聞故甘撫胡復齋之赴

老友日淪喪凋年涕淚多蜀岡應罷社楚些不成歌

復齋

本武陵人

舊德先朝重餘生衰病過昨冬臨別語魂斷

我如何

時已在病榻握予手嘆曰明年此際恐不再見

累葉清華胄兼之幹濟才所因非有染驟貴竟為災

帝德宏三脊朋悰感八哀故人隔江介絮酒待春來

時

將至吳門欲渡江一哭之而不克

辱有忘年契登壇共說詩最憐拓落者閑却

聖明時

復齋每誦此句隨會不可作虞翻誰見知寂寥身後事以惜予故用之

剩得幾楊枝

故理刑陳公臥子有大功于吾甌粵而祀典未備

以嫌忌也秋勝偶商及之予請援太守湯公之

例祠之書院中

東陽許都難幾社與之相始終不有賢司李漫天禍且

遍浙東功成辭賞去欲以此意謝閻公孤忠踐妖夢二

千年上感殷通竟殉華亭鶴上覲思陵攀墮弓可憐故

部民尚撫甘棠生餘恫何地薦谿毛春猿秋鶴飛吟中

聖朝已不諱亡國之恨如冰融戢山有精舍聊分一



魚塘亭詩集 卷六  
座志報功請看三犀石太守祠祀將無同長哦稊水詩  
定有靈旗颯颯來吳淞

穎谷索題米海嶽五星研三年矣今臘過吳重出  
研觀之奉呈七言

當年慶歷瑞同宮關洛先登道岸通餘事總超百代上  
寒芒又落五州中研山未泯蟾蜍淚墨苑長憐鸚鵡工  
爾亦少微垣裏客風流遙繼石田翁

其蓋有石翁銘詞

題樸莊拾得研趙寒山物也亦爲穎谷

寒山一片石孤格挂晴霓想其箋說文曾共陪青藜可  
惜多謬誤願君滌研細論之

又題穎谷青牛研

老子樹下骨紫氣長益然誰謂爾無牛代耕歲十千

讀陶公飲酒詩

以下西笑集

道喪向千載有志卽已難昔我亦不惡忽忽成永歎問  
津遍六籍彌縫無一完還持此耿耿以告諸少年

勁風無榮木皇皇求孤松此陰殊未易託身將安從何  
當化孤松以待彼飛鴻

連林好托庇誰謂獨見竒不見今之人愈獨且愈嗤嗟  
我思尙同但未諳汨泥

饑來驅我行諒哉非久計東籬念旅人爲之減佳氣喟



然感飄蓬孤舟長不繫

倘保此枯槁身後良稱心所憂終不免一跌污塵襟息  
機竟何時聊爲商聲吟

壯節思長公高風愛仲理古人豈可希竊向往之耳是  
誰紛狐疑謂我空凍餒晨鷄未肯鳴尙亦守所恥

郝仲輿九經稿今藏吾鄉張氏

湘東老子傳故紙塗乙長留妙墨香想當講堂孤坐日  
膏肓廢疾細商量于今述朱遍天下經師心氣悶不揚  
誰知瑣瑣黃門筆尙落鄞江蠹鼠旁

京山讀史漢諸  
種皆曰瑣瑣

宜田欲開雕菼山先生遺書屬予讐正而予已辭

講席因以書歸之劉氏并柬補堂

當年伊洛發遺書鄭重張朱校勘餘束髮有心傳墜緒  
白頭把卷竟踟躕

少師香火最嬰情三月俄慚輟講行祇爲白駒蕉萃甚  
場苗別自費經營

過桐齋弔廢翁鼓峯隱學三先生

證人裘洽到東勾磊落三君最上頭九死尙傳絕學重  
不徒甲子義熙留

三先生首招南雷爲講學之侶是齋  
其所倡也甬上後起之盛實由三先

生導

同谷覓深寧先生墓不得



此詩似有脫落  
不特辭氣未足  
亦無此語也

逝者如可作先生吾所歸空吟遂初賦莫覓浚儀碑荒  
山斜日杜鵑飛

佛隴題高夫人墓即在佛隴菴旁桂林留守  
瞿夫人嘗訪夫人來此菴

巖疆百戰已成灰有子焦原接跡來合與夫人人外去

禪花歲歲墓門開

寒食微雨欲展先宗伯公墓不果

東風打梨花病夫意瑟瑟西山隔重湖徘徊前復輟橫

塘鼓吹喧知是諸郎船

邱抄

士苦不通今何以知世務士或過通今行且敗吾素五

二詩亦似未在此  
結古人難見之  
世語意不可言  
得便也

夜秉蘭膏徘徊讀邱抄

江鱈

此郎風味擅江碕珍重春深上市遲誰教先期百輩至

青螺白蜆總肩隨

信宿姚江舟中偶作三哀詩

張先生客卿蘇先生  
存方邵先生得魯也

張本鄞廣文丙戌後隱雪竇邵亦隱雪竇最久  
而蘇曾入鄞參密老皆于吾鄉為寓公嗚呼三  
先生之大節豈余以寓公故私之  
而所歎者姚人或反莫之知也

天上客星人經師湖學風規豈似之冷官蒿目際陽九

赤手安得匡危時恢復人心第一檄傳者竊笑聞者嘻

豈知天地遽崩裂竟坐此故成陵夷乃信巖疆在方寸



不恃高城與深池差喜臣心尙無恙未須討貳勤濟師  
妙高臺上乾淨土殘山足與寸心依吁嗟世道日淪陷  
莫卜此心來復期大招廣招不可返茫茫憂患何人知  
臨風遙邁足三歎重泉應與我同唏

海門弟子誰先傳石梁鏗鏗儒而禪有客從之得妙諦  
亂後靈光尙巋然四明山中茅一把醒卽讀書倦卽眠  
腥風血瀑遍下界而我神遊炎黃間偶然小詩鳴自得  
擺脫籬落追天鷲律以學統或未粹要其風格良孤騫  
百年浙學久墜地石梁薪火亦荒烟樵牧安能認帶草  
蘇園寂寂無故氊

太冲先生不甚可存方之學謂與史子虛沈求如一例而澤望先生極稱

之予謂存方風格自是義熙以前人物未易及也

東陵一生真狷者苦節凜冽吐寒芒祥麟降生偏不偶  
天實厄之當滄桑桃源何處避何所一洗頭顱歸竺王  
豈以軍持謝世事翻從魚鼓擔綱常可憐潭上一畝居  
欲扶九鼎則已狂十年雪竇混姓氏晚竄福巖竟淪亡  
慈雲不足消冤怨祈死得死何堂堂曰故遺民非衲子  
死返初服朝毅皇謝翱方鳳不終泯山水爲之留耿光  
三哀賦罷山鬼嘯春潮夜漲天蒼蒼

寄懷穆堂閣學

三朝遺舊德一病竟侵尋孤負佐王畧空餘衛道心息



機消噩夢觀物寄清吟何日浮彭蠡重陳昔與今

孺廬仙去後歡會孰追尋試挂徐公劍應傷向子心暮

雲已索莫新雨費沉吟脈脈瓣香在相要亘古今

冉冉蹉跎老王黃緒莫尋已知隣暮氣所愧負初心懷

舊紛多感憂時亦輟吟自從邗上別荒落到于今

先生謬許

予為深寧東發以後一人慚媿屬望之殷今未五十而衰永懷知已不禁憮然

。二西詩

三危舊是中原地分比苗民尙有存其在五燈亦無賴

偏于諸部獨稱尊誨淫定足招天譴闡化空教種禍根

安得掃除羣孽淨不教西土惑遊魂

右烏斯藏

五洲海外無稽語奇技今為上國收別抱心情圖狡逞

妄將教術釀橫流天官浪詔龐熊歷地險深貽閩粵憂

夙有哲人陳曲突諸公幸早杜陰謀

右歐羅巴

。卽事

中天玉燭正當陽聞道番酋悔陸梁須信止戈方是武

不關辟土始為疆黑頭上相脂車返白髮元戎看劍長

此日西垂多樂事羌髻無復有塵揚

夜讀石齋先生駢枝集

先生經術粹無疵少作流傳玩世詞我讀洞璣希領會

挑燈聊爾擬駢枝

其禍驗於今日德者之遠慮深謀當國者多忽之於教



○太白山中弔二公子 西焯為故尚書龍泉郭忠烈公維經子可立為故侍郎休

寧金文毅公聲子今寺中無復有知此二師者矣予仍稱之為公子存其真也

太宰諸郎君次第殉國難既以慰先公亦有光楊萬愍

遭此殘生東竄餘一綫司馬祗孤兒曾叅績谿戰幸逃

笄橋死亦得保餘喘投身玲瓏巖受役伊蒲飯世系既

沈埋頭角甘漫漶相看各相訝有淚不可濺 郭公長子應銓字甄

孟次子應衡字仲平從子應煜字扶生皆以樞部郎從戎而死而西焯之名不可攷其浮屠名曰興徹金公志

其先墓祗載一子名敦涵不知即可立否其浮屠名曰一女為尼于吳師事藥菴曰超遜

從來鸞鳳種所在有寒芒雖然經百罹其精未消亡清

關魚鼓下雜沓混否臧豈期來精衛繞寺為徬徨山靈

大驚咤此是誰上堂中司一朝來老眼終無荒謂彼二

少年顛末宜致詳睂間有兵氣頰上尤凌霜扣之堅不

語乃相與連床中宵竟飶得一慟血元黃請看新被衣

猶隱舊劍鉞山靈大歡喜呵護有仁王 二公子執爨且數年都御史高

公元若來寺中物色得之一院皆驚

密公高弟子少亦不碌碌所以茲山中接踵來者宿記

得甲申年曾賦新蒲綠一朝荷徵書夜猿厭空谷欲稱

大薙師新著朝天錄痛絕諸葛兒隨車遭迫促白圭險

被污素絲危見辱高原所照臨誓難負幽獨幸得脫身

還有淚已萬斛終身向西戒豈以長齋贖空門亦易腥



殆哉此孤躅方歎中司言前知良以卓高公贈西炤詩曰應歎空門裏腥塵亦易干至是幾為詩識

吁嗟桑海間志士競沈冥荒山萬招提殊不少駱丞年運與俱往誰為留名稱我來過凰谿雲外聞蘭馨將無

二公子魂魄所式憑獨憐采風者谷音久飄零我詩雖不工聊足補獻徵擊碎竹如意空中聲登登時道恣之徒不欲隨

行者二公子之外尚有沙門雪樵名真樸亦高節

江行遇風舍舟而陸

一壺空自貯未敢試中流豈曰掉頭愁將貽沒頂羞天方寵箕伯吾欲愬靈修祇有江豚輩乘潮舞石尤

滄浪今絕險濯足亦驚心忠信難為力傾危未可任有生隨厲揭無術善浮沈老我青鞋便歸途緩緩吟

薄暮巽亭見過

相逢新綠下暝色滿湖濱漁火參差出天星旁午分故人偶遊息而我正微醺何處鯨鐘動南藍夜講殷

過潘石枰故勺園

一卷覓瓢餘井泥傷廢墅殘春弔落花無復詩人至

碣石行

故都御史華亭徐公孚遠乘桴廿年從亡道梗由安南入覲安南要以臣禮不屈而

歸所傳交行集者也歸而同延平入臺延平亡臺軍漸削乃復入中土栖遑無就至碣石依宮保總戎吳君六奇竟以完髮終其野死為可悲其得保顛毛則亦僅有之事也吾獨壯吳君之



出自賤微自草竊而能為天下留貞臣之命使  
得以無恙威儀入地是亦絕世之奇矣世人但  
舉查職方一事以為佳話豈足以盡之哉宜其  
克享功名歿邀順恪之謚也若田間先生謂徐  
公歸自安趾即留碣石則譌矣抑  
國史吳君傳中亦應大書者也

子遺孤臣頭雪白不死東寧死碣石吾戴吾頭吾知免  
一枝幸藉將軍力冥鴻何處覓安宅老罷帳中堪避弋  
鴟鴞不敢加彈射幾社故人最生色夏公感歎何公喜  
更有陳公同太息相與驚魂且動魄謂斯人者從何來  
古心所照天地碧碣石風雷生畫戟誰知中有柳車客  
海王為之司眠食朝看揚潮汐重沙在昔韓王亦無輦  
竟賣鍾離足長喟

諧烟嶼

先生高臥讀書臺帽有塵封屐有苔不是吠龍紛惱亂  
等閑安得過牆來

○久不登天一閣偶過有感

歷年二百書無恙天下儲藏獨此家為愛墨香長繞屋  
祇憐帶草未開花一甌追溯風流舊十載重驚霜髻加  
老我尚知孤竹路誰來津逮共乘槎

○臨桂伯錦歸曲

事見所知錄

臨桂相公何精忠側身蠻瘴矢匪躬漢家九鼎自岌岌  
孤臣浩氣自熊熊殘疆累蹶亦累振其奈天廢無成功



幸逃九死竟一死誰知都在前定中真人珍重說錦衣  
翻成馬革亦已竒應思此言有精義堪歎世人知者希  
真人定是赤松儕不逢赤劉盛偏逢赤劉衰秘記空陳  
赤伏災赤伏雖邁災其在相公不爲災堂堂錦衣神歸  
來正命而終天所諧相公竟錦歸從者爲阿誰副樞張  
公緩帶陪大將焦公鞞鞞隨緋袍公子參旄麾箕尾光  
照虞山陲改冠易服誰氏子褐寬博者視有泚乃知錦  
衣不在此我讀浩氣吟指南而後有遺音真人密授獨  
未及幾令佚事憂消沉將無貞臣不語怪恥逐啼鴉返  
故林試歌錦歸曲懸知陟降神所臨赤松仙人諒不死  
茗雪之間光尙紫何當尋之話舊史

鈍軒謂瓜子蛤未有賦者因同作

海王副瓜遺其仁飛入新蒲得化身紅藥風翻初上市  
黃梅雨過又宜人芳鮮聊爲薄醉下大嚼未堪老饕陳  
不知許事且作達掌故長貽合氏珍



鮎埼亭詩集卷第八終

鮎埼亭詩集卷第九

甬上全祖望紹衣著

谿上後學鄭爾齡校刊

五令君詩

以下雙韭  
以下房夏課

乙丙之間甬勾百六生民莫保殘喘猶幸五令  
 君者皆仁人也五令君曰職方兼知鄞縣濟人  
 秋水袁侯州佐曰兵科兼知慈谿縣揚人螺山  
 王侯玉藻曰職方兼知定海縣南陵弋江朱侯  
 懋華曰御史兼知奉化縣吳人虛谷顧侯之俊  
 曰職方兼知象山縣萊人如圃姜侯圻王朱顧  
 皆甲申以前所授官圖經尚存其姓氏袁姜則  
 出東江之版授遂無知之者是豈部民之所可  
 恻然已耶乃  
 各繫以詩

二靈雲蒼蒼嘉澤祀皇皇至今錢湖葑居然召伯棠

詳見

曾大父太常公乙  
丙之際存湖錄



大義絕賊臣私恩寧足紀斯意關綱常保障其細耳螺山

拒其房師之從逆者當時甲乙科中人多以為非不知君臣分義先于師生是乃所以扶持正氣也

朱侯真幹才坐嘯鎮海澨笑謂王武寧高牙空虎視

瓜里仗聲援同仇首剡源崎嶇嶺嶠魂未忘茲彈丸虛谷

從亡入閩閩亡入粵間關盡瘁而死

姜郎忠臣兒一官竟賫志我作先祠銘尙亦光義幟予方

為其先忠肅公祠堂碑銘

巽亭約為蜜巖一帶之遊予謝未能也是日偶和

故太常莊公九月二日詩

亳社當年萬古愁城門軍散弔延秋灰心已分孤臣死

續命還因宗國留不道微行遭婦口定傷多事戴吾頭

明朝正有溪船約腸斷休為二皎遊

偃月堤夜泛

大火蒸雲苦晚潮浴月涼慶豐樓上酒同發妙蓮香賀

監定不死時亭豈可荒南鳥正三匝一曲思蒼茫

再和漢曉太常詩

空山循髮訴牢愁為道秋今非我秋夏肆更誰完百粵

周遺枉自愧雙留不堪東望長垂翼砥合西歸亟掉頭

三復林生大還句居然騷些共神遊

暑甚不寐



魚塘亭詩集 卷九  
夜色渺無際廓然清我心夜香一枝放翻嫌昵我襟夜  
氣滿太虛閒誦香谿箴

三和漢曉太常詩

茫茫望帝結春愁百鳥分愁直到秋試看沙蟲祈速死  
誰言山鷓肯遲留赤符那得興鯨背白版虛傳瑞鯉頭  
剩有流貽巾幗語詩人據拾供清遊

諸子追和莊太常詩成卷爲題其後

諸子清才善寫愁吟成老氣各橫秋三閭竟爾乘虬去  
一嫗叨緣附驥留在昔人爭憂裂幘于今吾極愛科頭  
剩餘一脈昭忠志白露蒼葭好溯遊

七夕前七日作

天公幾日秋晉鄭頭畢白候蟲獨欣然爭鳴滿四壁我  
亦無如何一夜吹長笛

大塊感噫氣於以成商聲是噫從何來牛郎訴不平乃  
知一物闕足以擾清寧

衰病正連綿撫時增蕭瑟前有一樽酒不醒積毀骨連  
朝風雨多芭蕉益愁絕

楊氏脩園

太僕佳公子風流別墅開神鴉猶護樹怪石已爲灰

楊園

中花神祠今爲地踞雙湖勝人稱一代才誰傳獬兒語



吟眺幾徘徊嘉則先生每呼伯翼為獠兒難與爭鋒

沈氏暢園

尙寶好兄弟超然謝黨論嘉名分襖帖小築傍空門文

諸子當天啟時俱能自拔于浙人衣鉢之外不求進尙取其放懷詩酒亦可尙也園中題署皆取襖帖中語尙

有懷寧墨能汚貞士魂風騷今雨散蔓草滿城根阮尙書大

鍼與文舍人啟美嘗借寓茲園唱和阮文臭味不同而以絲竹之好相連綴詳見暢園志中

陸氏意園

在昔浚儀長幽居肖輞川花連堤上錦雲接洞中天南岸

為先宗伯桃花堤西岸即鳩據因多難鴻冥遂杳然我史文惠王之真隱洞天也

來覓陳迹重說義熙年武成以國難故播遷不返是園遂為降臣所有

七夕鈍軒集同人祭蒼翁於隱學山房

今夕是何夕良辰好祭忠秋江潮汐壯銀漢女牛通耿

耿扶韓志堂堂磔卞功我歌降神曲天半吐長虹蒼翁正命

之辰重九前二日也同人聚散無常故不能盡同此日

為嘆五君子天中畢命時共姜宣母教樞使有孫枝嫻

姪清門重賓寮合食宜多情仗羣從聊以慰陵夷是日配食

為若思先生共姜若思母周太安人也大節詳予所傳嫻姪即見蒼水哭若思詩

正翁洵舊德屣屣幾傾家掉首辭塵劫低眉誦法華薇

應清似粟梅亦大于瓜此日陪靈馭寧慚博望槎鈍軒曾祖

正先大行晚受戒于大梅法幢禪師與桐城方子留輩並稱上座是日別設伊蒲食以配之



招魂如可作移榜不須嫌故國無星火伊人在水兼欲  
推瓣香力遍為國殤拈竚待禮成日新題樂府鹽時予方議  
合祭甲乙以後二  
十八忠為之立祠

寶墨齋看蕙

臭以同心合香叨東壁分秋來倍爽潔病後易沈醺倘  
許幽人佩休令王者聞為君鼓一曲珍重十年薰君山謝選

部之籍已十五年

萬竹山中訪故少叅夢章羅公避地寓

剡源清絕處傳是使君居辛苦畫江後章皇蹈海餘周  
黎猶被蔭蜀道竟何如合有甘棠祀同招海岸車吾鄉節推

之應祀者海岸黃忠潔公而少叅之有功于東江生死雖異其忠一也萬履安云少叅丙戌後衣冠不改尙能為諸遺民之寄居剡中者所仗庇尤不可及海岸大節登于明史至少叅則泯然矣為之三嘆

鈍軒索題小照

風流公子重清門衫袖都成書畫痕莫以華顛嘆遲暮  
依然慘綠映朝暉

飄蓬我亦媿前盟那得丹砂一昔成只有飛揚心氣在  
披圖約畧見平生

偶示諸生

十年未得去矜心把卷誰為上蔡箴亦有差強人意處  
硜硜不作導諛音



沈郎曾有膏肓語為讀君詩長傲多幾度沉吟難自克

江河滿目正頽波

吳江沈果堂徵士謂予讀鮑培亭集能令人傲亦能令人壯得失相半子

甚佩其言

拓落泥塗我自甘斯民蕉萃是誰慚羣公定有經綸在

可許低頭子細參

榆林村中弔戴帥初

剡源老子師傳盛曾從巽齋復厚齋洞天福地釀清氣

殘山剩水傷老懷咸淳百年遺民貴至元一出晚節乖

而今文統將誰寄紅樹黃泥漫滿崖

帥初祇得為文學今圖經承李氏宋

遺民廣錄之誤改入隱逸甚不合當以舊志為是

新得袁伯長學士研試筆賦之兼示配京冲一兩

茂才

珍重清容研留遺延祐餘曾調靜寄墨及侍友恭書樞

使門庭古南湖池榭虛一區今屬我奚翅百璠璣

此地溯文獻陽源最長雄史存梅磻窖經發竹林筒呵

護欣無恙烟雲尚不窮故應靈淑氣長吐石田中

聞昔新河啟高才遂挺生天心愍磽确地肺應文明日

送花磚麗山披石質瑩猶傳頻扈從橐研度開平

相傳端平

以後堪輿家言慶元城西若開新河一道當生大文人及河開清容生

前輩淵源盡誰其足嗣音菑畚如不怠阡陌豈難尋忽



忽中衰恨茫茫後死心同疇期二妙一振式微吟

配京贈研先以長句一首未之和也翌日更答之  
我欲銘研幾踟躕前光後輝媿弗如安得好句鳴瓊瑤  
綠髻盧郎才思雄滌研哦詩雲蓬蓬我則奚堪徒怔忡  
由來文章千古事清容町畦豈易至聞道登壇奪燾年  
研溪夜夜孕青蓮大兒奎章虞道園小兒中司馬石田  
鷗波王孫僅隨肩左右先後研席間此後拓落向阿誰  
蓬飄梗泛定堪悲清容魂魄亦安歸我今冉冉益荒學  
合六州鐵不鑄錯研中光氣方氤氳但當爲君拂拭勤  
代興之語惡敢聞

配京和賦伯長學士研詩因借抄其集

斯文應有寄我老已將休爲撫遺編在寧徒一研留膏  
盲箴五失師友重千秋此意沉吟久無爲石丈羞

六詔山深處王郎故物存誰披被水帖又遇越公孫十  
笏精靈聚中原文獻尊需君學成日重酌片雲根

剡源第一

曲曰六詔有王右軍研見舊志而學士集中評襍帖最爲精當

老友董映泉挽詩

與君共和太常詩爭羨崢嶸老鶴姿危腦忽傳妖夢踐  
匆匆又作挽君詞

清門兄弟俱僑札醇德終當數長公最是斷腸身後事



魚尾亭詩集 九卷  
墮樵遺秉亦成空

老去精思審六書直探皇極銳何如而今撒手空行去

脈望翩然返太虛

君老而好學欲從予講求祝氏皇極數學因探聲韻諸圖之蘊予逡巡未

果而君逝矣

灌浦鄭氏秋丁祭黃子

黃子澤五世于今已一絲閣下木樨花秋來放幾枝嗟

我勵私淑未得揖讓于其時

張二茂才炳和予清容研詩答之

念爾通家秀孤吟秋樹根風流亦猶庶心事向誰論近

狀蕪田困先疇黃石存還期崇耿介特達重清門

戴山諸生來訊

以下帖經餘事集

臯比未煖匆匆去慚愧猶縈去後思舊學商量無別語  
莫將輕俊玷清姿

多師未必真求益不若歸求自有餘試到十年養氣後  
更叅斯語定何如

田宏遇謁曲阜挾妓楊宛以行其碑今尙存未有  
宛詩賦而志之

田郎寵靈仗一女乃敢呵詈及盈廷其時盈廷或可詈

不知田郎何所能

碑文盛指百官之庸科舉取士之誤國

循碑雒誦得妓

句自古妄人得未曾九原如遇孔中丞一殛定洗林廟



腥

瓶花齋雨集天台寺僧適以鹿銜草至甌亭索賦

分韻

小草曰吳風其來自洞天逐逐千年鹿見之口流涎藉以金庭茅沃以桐栢泉一莖足療饑十莖足忘寒久久遂跨鹿御風遊層元寺僧日拾之珍重禪枝前時從綺霞中一接紫栢烟道力兼佛力妙合彌神完詞客一見喜擬取投觥船向我徵掌故欲補桐君篇鴉銜足消毒蛇銜足摧堅龍銜足導氣功效各有傳惟羣動有鹿亦最夸長年其類爲羣麋嗜好伯仲間解角候雖別口澤

頗同然我聞其賦材上稟鶉鳥躔陽冰暨陰火道在互節宜謂宜參二冬和齊乃無愆或者妄解之貽誤不可言草性溫顧或誤以爲涼則甚謬願君更致詳折衷訪臞仙吾衰已冉冉百憂感纏綿鹿亭大小韭力不振積孱何當度闔風長嘯棄塵緣今夕且聽雨蕉窗漏濺濺

煨芋分韻

蹲鴟真清供殊校晚肉潔其魁大于瓜其子圓于栗愛其秉素心兼足飽餓餐上之應昂星下或謠鴻隙菓以百斛充栢以三年黜亦何足駭人許氏言未覈客含腥蠶希齋厨宿火活燔之通中堅蒸之消內熱寒烟映暮



山元氣滿淨室審候宜紆徐導和防苑結意味既疏通

皮毛斯解脫名理悟空靈禪力驗克實其在伊蒲中野

趣足怡悅切莫似馮郎使與蘿蔔捋已公傍晚來大恒和尚

相對正蕭瑟詞客更聯翩聽雨聲不絕薦盤何累累下

手爭勃勃魚鼓正沈沈先取祭老佛試參水晶鹽雙清

有如雪但覺道腴盈更無塵思汨斯人苦章皇大半為

舖啜安得擅一區阻饑不足休便傍瓦鑪灰撥之消寒

冽此意足沈吟簷霜響瑤屑阿誰習老饒杯炙耽殘褻

攢眉乞破戒失望竟咄咄茨檐而我但催詩白戰亦奇崛

大恒招集南屏分韻

試看南山色連朝倍老蒼青霜封曲磴黃葉下空廊旅

客遊方倦寒蟲蟄漸忙昨聞開酒戒來過遠公房是日大恒

為予破戒置酒

題陳秋濤相國墨蹟

公昔張空拳思以振赤符赤符讖不驗滄海為之枯天

廢誰能興志士枉受屠唯是桂林燼仗此稍支吾畢竟

延一綫東僵西則蘇連衡張陳霍旁暨韓麥徒張公家玉陳公

邦彥霍公師連韓公如璜麥公而炫以致惠國公翻然成改圖孤忠天所

鑒識亦未盡誣卷中詩云世事予多識浮生亦有天當是公甲申後作南極竟渾

一百年拱車書尙有妙墨寶流落漸江隅寒芒而正色



英爽與之俱番禺耆老盡文獻誰為儲秋痕隨秋去剩  
此灰劫餘相國所作詩名秋痕連呼玉畫又收之緘中厨

望谿侍郎輓詩

前年我過滑園中先生留我開經筒七治儀禮老未竟  
上糾康成下繼公惜我投閒空咄咄戒我浪遊徒匆匆  
速我著書漫忽忽倚杖而嘆神熊熊東西宿老淪落盡  
巋然靈光世所宗其秋示我新雕集寄聲他山錯可攻  
長箋亦聊貢一得謂以寸莛叩巨鐘謙光一一盡刊削  
再索直言資折衷三江迢迢未盡達豈期妖夢告蛇龍  
昨秋予以先生集中商榷如干條託樸山先生寄之不料其不達擬再寄不果遺書行世僅十

五尚有秘篋干長虹由來舊德為時重雖復不用亦有  
功試看浮玉山頭色一夜愁雲冥濛濛江東有客近悔  
過欲齋絮酒哭幽宮尉佗拜表去黃屋孰與漢大敢怙  
終我詩寄聲到蒿里先生一笑降虛空堇浦向不見得于先生頗擦異議及聞赴嘆曰吾方欲之秣陵一拜床下不料願竟不遂長負此愧乃以文哭之自道疇昔

題張丈亟齋手校漢隸釋源後贈施六上舍北亭

讀書識字今所希施郎兀兀忘其疲六藝妙處足不朽  
上函雅故通精微符山堂上大布衣渺然古心追籀斯  
七載寒窗校漢隸欲以赤手報婁機卯柳桃菜紛謬誤  
我昔泛覽多闕疑二首六身豈易曉一束二縫亦難稽



五日之門歷所誚三豕之渡史莫釐馬尾虎穴充談助

落筆茫茫空累唏吁嗟小學已廢絕我亦有目如霧迷

昔者襄陽近臨川署名猶為世所譏亟齋謂米顛錯寫芾字而北亭亦笑

臨川先生名不施郎何處得此本老眼恍然逢珠璣符

山遺書已四散淮浦帶草空離離神呵鬼護幸存此一

朝靈物得所歸巧偷豪奪世不少尙其寶之防速飛北亭

以予之愛之也乃以贈予即為其尊先人墓銘潤筆予詩遂成佳話

長至日展蒼公墓同江聲用離合格

九沙仙去後瓣香過者希觀察真多情偕我踏山蹊謝山

致江聲今日正南至一陽氣霏霏太史多雅懷來看朱鳥

飛江聲答謝山墓前麟辟邪亦是故國儀一枝借孤忠星火

以為依謝山承聞豐狐筆已草黃絹碑明年速上石長作

山中輝江聲

病中三首

疇昔負壯志寧當遽就衰二毛嗟早見一病盼春回自舊

年沈疾後蕉萃遂不可振哀樂偏多感升沉不待推尸居慕姑射何

以絕塵埃用止齋先生語

聞道長安信徵書下石渠遺經增氣色左席寵師儒一

洗專門陋寧愁六藝蕪膏肓吾自媿廢疾不堪扶時有致諸

公見推之意者即以此詩答之



魚尾亭詩集 卷九 三 冬 終 陽 病  
到處山陽笛淒然感客心此生豈金石幾度悵人琴試  
問歲寒客誰投空谷音便教長老健顧影已蕭森

鈍軒爲俞四蜚聲畫雪中高士圖索題

高士愛冬不愛春落落冬心冷愈醇坐笑春風野馬塵  
自冬發春乃長新千山萬逕蹤跡絕冰甌清絕見天根  
寒厓之黍抱凍蹲中有鴻濛木介痕百昌不復能氤氳  
誰知老子心脾愈淨骨愈尊是誰滕六誰葛三造化小  
兒遣來伴吟魂山鬼颯颯噤不語但見崢嶸鹿角橫黃  
昏暗香疎影自怡悅忽然老鶴一聲戛然下天門力能  
通乾而流坤萬籟盡泯我獨存底問北枝爲弟南枝昆

冬耶春耶一笑歸混敦

。即事

神州舊說江南好十載顛顛望幸殷一自中天消息降  
山增金碧水增雲

庚午歲朝

吠日吠雪犬譁然嗥南嗥北客不前老夫所憂在無年  
穉兒不解事應門索紅箋

逸田以人日祭蒼翁得三絕句

春來猶自怯霜風人日題詩酌信公畢竟擘蘭家法在  
細挑七種菜叢叢



最憐民部遊仙日正是元樞授命年地下雙雙埋碧血  
人間久久發陳編

華屋山邱一望中誰來城北弔遺忠張徐楊葉都零落  
剩有平陵松柏桐張遺民徐石耕楊竹畝葉天益皆居城北附近尚書里第今其後人俱亡矣

配京書齋故寒厓先生居也不可無詩

聞君焚膏地舊是寒厓廬將無承塵上或有戊子紀事  
書吁嗟小江一坏土嘿農諸公陟降俱

偶然作

返葬師臣苦猶疑未乞休將無戀香火朽骨尚依周

疎傳真高蹈恩榮擅始終由來能審分不敢望功宗  
弓劍今蕉萃還為國體憐橋山遙在望回首一潸然

病甚有作

老夫春病太咄咄無處告訴但支離偶然欠申不自覺  
盲風間道窺心脾

昨宵舌本赤標怒流血驚怖雙牙關或者渙去惕亦出  
天心俯憐賀若頑舌間無故湧血

昔人欲心如槁木今我已槁乃逾危乍疑方寸已皸裂  
安得膚寸春雲垂心氣忽忽告盡異事也

仲翔骨節原生硬病裏猶添觸迂多幸未折腰已若此



倘教束帶更如何

湘東一目已郎當何堪更晦半面粧從今合眼亦自好

更莫奪我靈府光

三千丈髮且半白忽然作楚難按摩絲絲細擢罪莫悉

一握任爾勞婆婆

髮痛甚怪

世間萬事我何豫其奈百感偏嬰心此病天痼不可療

扁佗束手空沉吟

亡友姚蕙田嘗言予病在不善持志理會古人事不了又理會今人事安

病得不

諸生未了傳經業幾許關情在替人莫似老夫中暴棄

桑榆潦倒媿先民

配京借抄東發史稿列傳十篇予家所勵有也

抱遺老子趨庭日賣馬曾聞購日抄一卷遺文叅宋史

問君何以報瓊瑤

徐錦衣花乳石印譜

彎弓沒石志未遂揮刀切玉藝亦奇此是萇宏未埋血

雪泥鴻爪尙離離

明宗室隱頭陀寫文信公像故民部董次公先生

物也

南嶽諸劉嘆道窮重摹王蠟感孤忠懸知燕市光明相

跨鶴東來聽匪風

次公有匪風集詩



八赤舟中東薊林以下病目集

天子親裁錫類詩華堂爭誦錦歸時椎牛我自知難逮  
只合空江理釣絲

木雁遭逢豈可班羞居材與不材間故人爲我關情處  
莫學瓊山強定山

鱗埼亭下戶長扃未死心猶在六經但使稍能窺墜緒  
餘生不敢嘆沉冥

駒隙難將歲序留相看霜髯各盈頭益公爲待明農日  
重約誠齋共唱酬

鉏經圖爲藻川作

吾友子張子新成幽頌箋菑畚識元化箕豆戒蕪田負  
郭無多產逢秋別有年他時我止宿鷄黍足欣然

慶湖課耕圖爲秋塍作

朝過梅墅午麻谿別製秧歌被耦犁我亦來分餘餽好  
湯公祠下啖豚蹄

蓮宇先生再入政府

清德人無間孤根 帝所知重膺左席召不待大廷推  
民力方憂敝天災孰與支望公調玉燭晚節在斯時

雨中江聲葢林堇浦竹田雪舫雲亭過飲篁菴

叢桂香隨暮雨沉旅人獨坐正蕭森相逢舊雨皆華髮



魚尾亭詩集 卷九  
並奏清商寫素心米價未平愁歲歉江潮大上識秋深  
精藍喜與塵氛隔且擘鱸魚供醉吟

嶰谷北行同人分賦行裝余得油衣

客裏難教用瓦精偏逢雨雪送長征襟分薜荔牆頭色  
袖作芭蕉窗外聲渴日若升應棄置漏天未塞足孤行  
故人此日齊東道愁聽簷花落五更

穆堂先生下世欲作挽章不能盡所欲言援筆輒

泣然而止冉冉一載邗上寓中得三首亦竟未

足抒予痛也

坡穎好兄弟終身酬堯公後來陳正字沒齒感南豐薄

植寧堪比深恩實所同重江素車隔何日拜元宮

我有籲天語蒼蒼遠不聞終難遺一老殆欲喪斯文大

鳥臨江介妖星入楚分最憐用世志百折尙殷殷

淮上分襟後長愁十載多心期已孤負音問亦蹉跎絕

學知難紹雄文定不磨墓門雖寂寂正氣表山河

著老書屋分賦梅事予得吟梅

徙倚南枝下霜髭斷幾莖有香慰幽獨無句寫孤清雪  
釀高寒景山深太古情微吟猶未竟天上已橫參



鮎埼亭詩集卷第九終

鮎埼亭詩集卷第十

甬上全祖望紹衣著

谿上後學鄭爾齡校刊

東粵制撫以天章精舍山長相邀辭謝不得齒髮

日衰乃為五千里之行非予志也

以下度嶺集

忽忽暮春日茫茫五嶠行庭前書帶草遠別最關情

張生

瑶暉頗不欲予遠行

此去特謀食投荒作遠遊解嘲姑漫語好為訪羅浮

衰病畏行役屏營足不前杭生真邁往先我已揚鞭

時董

浦有粵秀山長之聘先行

嚴灘



魚...詩集 卷十 雙...閣...  
在昔紫薇翁說詩白雲原紫薇已仙去白雲滿江村

荒江撫木末尚有魯公魂我亦酌卮酒一弔謝生墳

。豫章小泊欲過哭孺廬學士墓下不得

弭節望東埂西州涕泗多素車吾有負元冕或來過莫

報恩如海應憐髻亦皤匆匆感隣笛落月滿江沱東埂學士

村居所在

。吉水道中

沂江西上去極目路漫漫岸泊山根穩天浮水面寬荒

涼如瘠土蹭蹬識驚灘况復石尤阻彌愁行路難

顛關

疇昔憐楊萬空將螳臂殘功應侔翟義志未遂田單往  
事魚羊劫遺民心膽寒沙場百戰地試上權關看

大庾

此地亦絕險開荒賴始興古梅却不喜行李破荒滕

紅棧驛

吳公持節真瀟灑手種南枝萬五千何物督郵堪領受

故應泥首酌梅銷

閩中艷說楓亭好未若臺關清復清敢以風塵輕下吏

美人高士共通靈楓亭驛產荔

楝花北去多為杏誰道南轅亦有然聞說瓊臺還六出



魚地亭詩集 卷一  
楷含狀裏未詳箋

海珠寺

落落三浮石相望鼎峙尊由來分地肺何處泝雲根日  
護朝臺影潮喧估客樽寺前古榕樹消暑足昕昏

三浮石謂

靈洲海珠浮邱也

菊坡不可見願得見文谿又復五百載吾將誰與齊孫

枝遍嶺嶠栗主傍招提尙有殘編在寒芒映彩霓

寺有李公

昂英祠

聞道炎興日軍烽鬪此間攙槍賊佛火矢石躡禪關小

鳥難填海愚公浪徙山三忠當勝國亦復踵殷頑

梅園小集

由來百粵士多艷說梅侯臺嶺南枝放珠江遺愛留尙  
餘湯沐在正傍水雲幽此地蕭閑甚披襟散百憂

天章精舍釋奠禮成示諸生

魁儒疇昔降神時紫水黃雲天命之世遠山川長寂寂

投壺誰唱代興詩

雲水爲白沙之瑞

瓌竒多學數瓊臺底事三原忽見猜力毀石翁尤可詫

瓣香姑舍莫相推

時多以瓊山不豫祠中爲疑

泰泉高弟稱盧子尙有遺書歷劫存怪殺圖經遂滅沒

我來重爲薦芳蓀

盧太守冠巖所著獻子偶存深造自得之言南海志乘竟無爲立傳者予



始表而出之

清瀾雅自居朱學學部成編世所傳此是當年執政意

真儒定論豈其然泰泉不喜陳王之學出于意見不合清瀾則投政府之所惡而攻之醜矣

江洲極口排貞復不以粉榆事黨同方信石翁真世嫡

肯將葱嶺玷宗風

由來報本重先河此席功應首見羅曾以講堂爭去就

蕭寥香火竟如何端州精舍始于李公分守嶺西所作其後以督府殷正茂不喜講學拂衣

去官今粵人無知之者予近討論先師但列粵中諸儒而未及泄斯土者然見羅斷不可憇然也當補行之

九日諸生請予登高於定山予病未能也梁新謝

天申黃文各有長句一首予亦同賦

秋來蕉萃倦題糕諸子行吟興各豪五嶺炎風宜落帽

八能清韻在登高東籬何處尋黃菊左手相看握巨螯

我亦揆天閣上望七星嵐翠自周遭

送耜堂掌教新會

沂水春風自在天白沙密授更誰傳張林湛李都零落

木鐸消沉三百年

年來絕學已榛蕪大雅危輪好共扶目送君舟自厓返

端溪涼月夜牀孤

木蘭花下共論文曾為諸生討論殷此去正逢冬日好

霜橙露菊薦黃雲



魚塘亭詩集 卷十 四  
越公墓下信公祠填海遺編試問之淒絕鷓鴣清夜淚  
一樽爲我酌南枝

江東粵秀講堂開定有雄文足起衰不道一時齊度嶺

浙宗和會廣宗來陽明甘泉同講  
學時稱爲二宗

蓬萊香吏正鳴琴主客遭逢定賞心倘有唱酬成別集

老夫乘興更相尋謂張  
揚菴

### 遊光孝寺

仲翔負直節垂老乃投荒饑啖荔支實渴飲訶子湯未  
知粵後進阿誰爲登堂至今寓寮畔書帶尙成行我亦  
骯髒人南來漫鼓篋浮屠不知儒但禮六祖塔

粵中之梅祖臺嶺而宗浮山然其餘郡國頗稀少  
予至端谿因憶海目詩中言官棠山中多古梅  
官棠海目之別墅也今未知存否乃語諸生訪  
之

嶺外梅花自古傳而今花事竟蕭然每當雪白風寒日  
孤負參橫月落天聞道官棠多佳植舊知詩老有流泉  
何當蠟屐同探去倘結瑤華歲晚緣卽用江洲  
先生詩

有以魚凍柑來餽者粵無柑實卽橘也而冒以爲  
柑指其小者爲橘詩以正之

千頭不下洞庭甘魚凍尤于霜後酣粵客未通韓氏錄



魚尾亭詩集 卷一  
錯將朱橘喚黃柑

宋韓彥直有橘錄

病甚偶然口授侍者

春來蕉萃木蘭花槁盡三冬金粟芽卽此便同官舍鵬

先期早爲報長沙

予窗前有木蘭花一樹甚愛之新歲將放花忽槁

誰言獻歲已兼旬不見南中草木春天亦與吾共蕭瑟  
蠻風蛋雨幾酸辛

示諸生

辛苦諸都講朝朝問起居稽疑頻筮易侍藥罷觀書共  
學情原摯當歸恨有餘服勤真古誼惆悵別征車  
自我開堂後相依未一年所懷多不盡有待或徐宣遂

爾匆匆去誰將耿耿傳諸君能自得定不藉言詮  
雅憐維繫意決去定非情其奈多憂患誰爲久合并相  
孚在志氣不隔有神明他日學成後扁舟慰老生

遊寶月壇

喬木蒼然古猶疑孝肅遺遙青接員屋新綠滿清池天  
曠定無暑地偏足自怡老夫輿疾過聊以慰支離

登閱江樓

端州城市裏偏側不成歡突兀樓臺起蒼茫眼界寬江  
天落襟袖烟雨幻林巒尙有大函碣摩挲蘚石看

七星巖



魚尾亭詩集 卷一  
天帝當年啟大樽，七星羅列似兒孫。洞門尚有歌鐘在，石室將無秘錄存。自昔湖山烟水濶，于今阡陌草萊焚。何當反復謠黃鵠，用瀉灘江春漲痕。謂瀝湖也。說見屈氏新語。白日伊誰巧琢成，離奇變幻有神明。乳泉上接天漿落，斗枋遙疑石笋擎。山鬼空中驚爆竹，詩人傍午作題名。老夫蹇足徒惆悵，病後探幽不勝情。

堇浦渡江來視疾

蕭晨病榻意淒然，剝啄驚來吾友船。春雨奄奄生趣盡，相看同喚奈何天。

白髮猶然動殺機，中央四角校盈虧。先生正恐心兵鬪，馮軾休輕用指麾。

親會張明府惕菴，以予將去粵有諸生無福之歎。予皇恐不敢當也。

泰山不作文昭逝，方信人師絕世無。自分衰殘天所廢，敢耽棧豆誤生徒。

孤負賢侯屬望奢，幾時帶草盡開花。鰕生量力知無補，只合焚香祀白沙。院中舊無先賢栗主，予始創祀白沙先生以下二十一人。

一年鼓動終無術，因病逃閒亦見幾。誰變秀才為學究，此中罪責有攸歸。

梁父主生亢父死，泰山秘冊定難詳。故人愛我將無過，



魚... 欲卜天心恐渺茫

時君謂予必不死以所蘊未盡暴于世也

肇慶訪故宮

當年草草構荒朝五虎猶然鬪口囂  
一夜桂花零落盡沙蟲猿鶴總魂消

辛苦何來笑澹翁徧行堂集玷宗風  
丹霞精舍成年譜

又在平南珠履中

丹霞精舍在南雄予嘗謂澹歸在五虎中本非端士不待為平南作年譜

而始一敗塗地也

天湖慶雲寺 有序

天湖本名頂湖相傳有湖在山頂  
今山頂無湖但平地耳或者桑海之變耶  
翁山則以瀑潭為湖亦近之

村夫子不知乃以為鼎湖而引黃帝弓劍之跡以附會之  
妄矣予病後將去粵諸生請入山因再宿漫成古詩三十二韻

明鏡本無臺菩提本無樹天湖本無湖莫問濫觴處  
放舟羚羊峽取道大蕉園遙青四十里知是白雲源  
路曲擬羊腸林深怖虎穴因緣古佛慈膜拜不脛集  
梁郎旣捨宅曹洞遂傳衣一自棲壑來弓冶盛軍持  
山花不識名各各吐香氣山鳥啼其間益然感春意  
從行二三子捷足善探竒而我已頽然扶掖仗闍黎  
努力躋絕頂端州如彈子一葦灘江流渺然溝澮耳  
俯睇七星巖蒲伏



來朝宗或曰彼瀝湖原與天湖通天湖今已平瀝湖漸  
 亦閉伏見均有時開塞定一氣更陟大龍湫飛瀑滿空  
 山清入人心脾寒動人髣髴其餘諸小潭環拱尙八九  
 或曰是皆湖未知果然否山僧愛敬客啜我白雲茶肺  
 腑滌塵氛齒頰吐香花坐久移我情疑與下界隔轉嫌  
 嵐氣濃鷓鴣催歸客阿誰不學者妄託軒轅遺謂是攀  
 髯跡謬語真無稽老夫病愁餘百事已心死一榻借諸  
 天五言授侍史未能寫清勝聊以正圖經他日討文獻

譌謬庶有徵

向來有山志然  
謏劣殊不足觀

天湖石船歌

高州石船舊見屈氏新語是山則  
未之聞也事見登封景氏崧臺集

天湖有石船夜半誰負去將無天湖涸石船因失據飛  
 行同怪山長逝不知處我作大招詞欲以返徒御湖通  
 船亦歸我便浮家此中住

天湖杜鵑花盛開

殷紅長明燈化作杜鵑血方知長至後已踰百七日故  
 鄉石窗下五色正葱蔚

。天湖之稱不知所出近從獨漉詩方知以桂王得  
 名也

當日小朝廷湖山別署名尙傳亡國痛敢爲望藍榮浩  
 劫幸垂盡慈雲慶永清遺民詩史在莫罄籲天情



萬年果

天湖萬年果稽含狀未具相傳石洞生或有石髓注我  
昨來山中偶拈澄谿句乞靈古先生詰朝倘有遇

白沙岡訪枕榔亭

今高要人所呼為龜峯者

習之昔南邁言登茲山阿故人題名在感舊幾婆娑今  
我亦來過望雲感羈寓為尋枕榔亭不見枕榔樹

研谿

昔人研材隨處有其後僅稱端與歙端既盛行歙亦衰  
纏羊日苦錐鑿及年來端產亦告盡竭澤而漁苦不給  
厲階徒為有司梗生者不敷采者急石工因之競售欺

冬瓜無瓢青花澁孤冢誰招常侍魂清風莫溯包家笈  
有司之困縱莫憐亦應稍為地脈攝是誰為我告  
天子封山罷貢足安緝鸚鵡夜眠睫不驚水雲重吐新  
蕉葉

甘竹灘鱗魚歌示梁新謝天申黃文

我聞甘竹灘在昔本盜巢三忠竊因之思以延小朝其  
時頰尾愁探丸驚周遭清流無恬鱗時物避腥濤太平  
踰百年滄波亦逍遙何況彼荏苒有不化樂郊牧人夢  
繁殖笙詩奏豐饒相望海目山比屋皆魚舫下灘與上  
灘肥瘠各分曹誰言風物異頗不下金焦

大江以南金山之鱗為最



錢塘次之粵中以甘  
竹為最海目次之  
眾師乘急艇來逐九江潮為我細

指語其口中櫻桃粉頰斯已劣鐵頰不待嘲其要在護

鱗比之珍青瑤三眠楊柳枝穿以入吾庖烹之宜苦笋

下之宜新醪膾之尤絕佳蟬翼輕雲飄乃知四腮鱸未

若茲堪豪粵鱸終不如吳鱸惟膾之老夫久病憊染指

破寂寥以侑益智粽愛其多芳膏諸生正格物登堂紛

諏咨是魚名氏多五雅未盡釐在古本曰鮪周公曾記

之在今或曰鱮集韻足補遺唯鱮至以春而鱮與夏期

一物分二候變化成差池別字曰當汭郭公箋可稽又

或但曰時偏旁亦依稀鄞人呼曰箭方言更詭竒在粵

曰三鮪其通為三鰲是亦見舊經埤蒼誤為鮪鮪鰲二字音之

通也見爾雅郭氏曰未詳而埤蒼誤以為鮪今粵諺曰

三鰲不過銅鼓灘乃知鰲即鮪也是足補爾雅注疏

自此更逆流不越銅鼓西老夫一笑粲洽聞良足資惟

是審名物奚事細碎為由來磊落人屑屑非所宜泝儂

年少時蟲魚亦紛披近欲比羅願遠將跨陸璣年來百

不能冥心已嫌遲但當食蛤蜊餘事安所知遙望甘竹

灘罨網掛晴霓甘竹灘豪余龍嘗受陳張諸公之爵國初被勦

羚羊峽

萬壑自西來奔騰不可迴中流成阨塞傑閣起崔嵬謂

樓思婦牢愁寄謂望勞臣檠戟開羚羊窺塔火掛角到



林隈

澶川訪海目先生故居

江洲好兄弟宮相以詩鳴侍郎江洲先生講明白沙之學為過澶川宅

水雲明且清風騷今道喪池榭亦塵冥太息斯人逝誰

為發地靈粵中詩人如五家三家多出東州其自端而西唯海目父子一門

嘉魚

嶠南雖澤國頗苦食無魚入市盡凡品薦盤乏芳腴丙

穴有佳種賦材良獨殊夷然惡溷濁而獨耽清虛元霧

供茹吐青苔飽有餘炎天偶見雪尤屬性所娛置身遠

潮汐因之謝泥淤是在高士中并丹足並驅初冬木葉

脫灘江氣蕭疎十里小湘峽夾岸皆罾罟蜀魚乘春出

以待漲水瀦粵魚乃冬遊以待潦水枯吾獨憐是魚待

時始一出一出遽危身豫且同剝裂何不老石潭誰得

窮其窟行矣尙速歸見幾莫終日

馮生元才家順德屬之訪李抱真先生畫猫然殊

恐其難得也

李公學道人閑情作畫師相傳小廬山沙翁曾賞之吾

家繙薑鼠四出不敢支乞靈得一卷潛伏倘有時購之

不敢用吳鹽李公之畫直百鍊吳中以鹽易猫

增城荔子



新州香荔已堪推掛綠東來更絕佳况有嘉名以人重  
當年曾入尚書懷以甘泉翁故有尚書懷之名

牂柯江上偶然作

牂柯怒濤亘萬里東江亭口不可磯桃花新漲忽山立  
一點塔火遙熹微

春來佳絕木棉花夾岸殷紅萬本賒此是承平好燈火

誰將烽燧向人誇木棉花是烽火樹尉陀語也

古榕高與碧霄參正以中虛內美含長為不材蒙訕諂

就中誰識有伽侑伽侑往往產榕樹中

萬山深處鬼神憑夜半風來楓樹鳴驀地一天雷電降

楓人束帶更垂纓

陸郎湯沐留南嶠帶礪丹青澤未沾天以陸谿長賜姓

不教鍾室起猜嫌錦石山有陸谿

水枝啖罷又山枝九夏輕紅劈荔時更浥天漿和脂水

女郎玉面發華滋

玉欄金井良無輩只恐炎天火易驕莫道黃皮是凡果

為郎消熱長神膏黃皮可以解荔支之熱

生成大化定難參物產由來未易諳不料赤龍都會地

荔奴反以背陽甘荔以向日者佳龍眼反是

山栽龍目水龍鬚別有屠龍絕伎殊抉取靈眸供大嚼



攀髯一夢已遽遽

高要金渡村有龍鬚席

女青百尺經冬茂貞婦門前合取栽亦有男青人不識此花或爲義夫開

東三峽更西三峽最愛靈山寺水清活火寒流烹諫果待郎夢醒解餘醒

陳村水比鏡湖清豆酒新淘一百瓶只恐南中灰力健願郎飲少爲尊生

連朝夏課莫須增可怕炎威易鬱蒸何物爲郎助清興夜來新製素馨燈

思夫村裏愁雲生望夫山下哀淚盈未若閨風巖獨好

鴛鴦雙雙共目成

巖有鴛鴦石

西樵山中茶事好最愛茶娘淑且閑秋胡問道嘿不答時有瀑泉掛髻鬟

端州白石淨于玉端州錦石爛如雲黃岡十里皆石戶女郎亦叅追琢勲

鮎埼亭下是儂家雪後沙螺舊所夸度嶺相逢重道故南京此足擅清華

農家旱潦最關情共卜田鷄上已鳴莫似翁山呼作蛤介蟲將與羸蟲爭

莫采廣寧員嶺笋迷人九十九條坑若許長年啖玉版



終迷亦足老吾生

粵之笋多苦首二句乃粵諺也

七星巖裏花蝙蝠五色迷人雙目睛不減羅浮大蝴蝶

仙風習習更通靈

杪春鱮白化為鱠正逐刀魚上市時試向漁家一問訊

家家蘆葉膾薑絲

鱮魚之在粵者多以鱮魚化而隨鱮魚出

極林村裏貢香柑道是如來信手拈莫訝柔荑竟拳曲

前身鈎弋不須占

西江前去路屯遭孤客行旌未易前郎到夜深須警醒

戒心尤在夢香船

夢香以破布葉之藥解之

春日春閨樂不支姊魚妹蜨競芳姿謂郎何事催粧急

且賦糖梅糖欖詩

粵婦以糖梅為子歸之贊次之糖欖

江門謁陳文恭公祠因訪文恭服玩遺器各賦一

首

碧玉老人太古心碧玉老人太古音老人去我三百載

許我登堂撫石琴

碧玉文恭樓名。右石琴

玉臺巾製已無存湛子猶傳葵笠尊有客切雲冠冪兀

白頭訪古到江門

右玉臺中文恭詩曰唯有白頭谿裏影至今猶戴玉臺巾是也甘泉以葵

笠授彌唐為傳衣即所云心性冠是也

石翁曾繡自然裳付授甘泉永勿忘我亦荷衣更芟製

摩挲襟襜浥餘芳

右自然裳



圭峯石上三茅君曾爲講堂供奉殷今日陽春私淑者  
何當分策管城勲右茅筆

蘭橈桂楫亦已遠玉色金聲倘可從如聞先生扣舷和  
春水汨汨雲淙淙右光風艇文恭及門伍君光宇所作也

寶查村蕉布歌

唐志端潮皆以入貢今端惟寶查廣利二村有  
之

珠娘怨甘蕉長作風雨聲縲以緯黃絲天孫見未曾當  
年貢天府舊史最有名近日尤矜貴市司罕所登由來  
織織手經年始織成但以私其夫膚清更神清客從寶

查來貽贈忽數尋用之作涼幃不翅貴南金儂衾如蕉  
葉儂便如蕉心展轉相什襲炎威遠不侵中夜夢殘時  
簷溜滴有聲喚醒帳中魂與之共清吟

慈元陵

高曹向孟均賢后尚有芳魂殉落暉一洗簽名臣妾媿  
虞淵雙抱二王歸

題故都督傅示容生勳故督佟養甲也

戊子翻城事可哀最憐故督是奴才已成負國難辭咎  
浪欲歸朝竟致災豈有遺民俱不攷妄將大節漫相推  
桂林殘史猶堪證曾受襄平封册來



艇子治春詞

尉它魑結亦風流曾作重三被水遊歌舞岡頭蘭芍盡  
鷓鴣獨自唱荒陬

秦女南來萬五千武王奇策亦奇緣至今越女多秦種  
可有鳴鳴舊曲傳

誰製花枝顰鑑銘回環宛轉似天成由來嶠外閨人巧  
獠女都能解四聲

番山剗去禺山削南漢荒唐不待論只合三春明月夜  
花田花下弔花魂

聞道西江女土司兵符親報擅奇姿滿堂記室承顏色  
獨愛東州海雪詩

吳淞女子思報國擾亂南中竟數年多少降臣蒙面死  
不如桑濮一嬋娟謂李成棟之姪也

丁敬身求予揚光孝寺千佛塔記詩以答之

訶林癡絕降王塔宦者名連髡者傳寒鐵千秋遭穢筆  
不須更玷蜜香箋

張新會惠葵扇

江門葵田遍阡陌員葉扶疏幾四尺長夏能噓長養風  
涼不傷人在溫克江門工師剪裁精被暴兼資水火力  
居然大雅成柔嘉蠲煩解躁有令德由來葵產異百材



入火不焦最雄特天蠶之絲紉以精棕竹之枝惠且直  
青銅爲扣玉爲板鶴耶鵝耶都減色南方赤帝赤標怒  
一遇此君都冰釋此物流遺自幾時相傳典午陪巾幘  
物經王謝總風流況在炎洲尤任職老夫久病熱惱侵  
安得臥冰揮素琴江門使君愛我深貺以雙扇清塵襟  
願君推此甘棠陰陰火陽冰互酌斟大洗愆伏慰我心

濠畔偶成

此山舊是小秦淮油壁香車處處排客自十三行口至  
定情先下寶珠釵

郎君落落擅春濃欲卜良緣安所從試祝堂前金孔雀

但教命中卽乘龍

波羅江上浣輕紗更有波羅新樣麻攜手波羅廟下去  
波羅密已大于瓜

夜來香以夜來甜郎若夜來香更添只恐不來孤負甚  
望穿花影動前簷

柳因顧媚與王微舊院遺民世所希天末朱樓安遠嶠  
板橋誰爲志芳菲

光緒己卯三月程君友寧庭偕讀此集以朱筆圈識之先生之詩

與聲律當一家流連景物者不同大抵直抒胸臆語必有本質實之

過亦傷其儂然其卡者多足以補史乘微文獻發潛聞幽聞者興



起共次賦物攷典亦可佐雅誌實韵談即題序小注皆非苟作不  
當以字句工拙之間求之若也是書夢庭得之麻肆上有印識為劫  
木庵道士際所藏且有藏諸行雁語是亦方外之勝侶矣閏月

三十日馬中山雨紫藤陰下書會稽李慈銘



先生自嶺南歸後次年即卒此集為病中所自編凡辛酉以前

詩畫刪之董小純挾先生年譜謂與歸以後有詩十餘首不能

成集蓋不復存也惟先生卒於乙亥七月其子昭然先生於三月中

瑤先生有采子詩十首為詩之絕筆是當附載於後而先生未收

以小純諸人之過美惡伯又書



鮎埼亭詩集卷第十終



先君子詩石先生嗜蓄書築牋經閣藏之計千有餘種

至鄉前輩著作搜羅尤備歲辛卯欲刻全謝山先生鮎

埼亭詩集未果棄養迄今四年矣齡嘗訪求善本冀成

厥志會定海厲駭谷志示齡甬上黃氏所藏董小純先

生校本齡淡幸之並取屠氏及二老閣諸本悉心校讐

復請業師家金門先生詔覆加審閱次第受梓閱五十

日工竣俾與鮎埼亭內外交集合為全璧固先君子之

志而亦讀先生書者之所許也夫

道光十四年五月望前五日谿上後學鄭爾齡菊人氏

謹識



嘉靖

丙戌十四年正月八日... 志而亦蕭然中書...

日工... 賦...

其... 賦...

其... 賦...

其... 賦...

其... 賦...

其... 賦...

其... 賦...





